

四庫全書

經部

欽定四庫全書

經部

春秋纂言卷六

七六

詳校官鴻臚寺少卿臣梁燾陽

給事中臣溫常綬覆勘

總校官進士臣繆琪

校對官中書臣王瑣

謄錄貢生臣湯安泰

欽定四庫全書

春秋纂言卷六

元 吳澄 撰

文公

名興僖公子母聲姜在位十八年夫人出姜

元年

乙未襄王二十六年。晉霸襄二年。蔡莊二十一年。曹共二十七年。衛成九年。鄭穆二

年。陳共六年。杞桓十一年。宋成十一年。齊昭七年。秦穆三十四年。楚成四十六年。弒

春

王正月

公即位

二月

癸亥朔日有食之

左穀無朔字

天王使叔服來會葬

叔字服名天子之上士三命者

夏

四月

丁巳葬我君僖公

杜氏曰七月而葬緩

天王使毛伯來錫公命

穀梁傳曰禮有受命無來錫命劉氏曰錫命者命為

諸侯也諸侯在喪稱子踰年即位喪畢以士服見於王王乃於廟命之古者五月而命至周喪畢則

命矣喪未畢而命非禮也澄曰毛邑伯爵王朝六命之卿有采地而錫爵者也

晉侯伐衛

左傳曰晉文公之季年諸侯朝晉衛成公不朝使孔達侵鄭伐綿訾及匡晉襄

公既祥使告於諸侯而伐衛先且居胥臣伐衛晉師圍戚取之獲孫昭子王氏箋義曰衛成公怨晉文公執歸京師故其季年不朝而且侵其鄰國示不從盟主也襄公嗣位欲脩文公之業先以衛侯之罪告於諸侯乃命大夫伐衛取其戚田諸侯於是畏威復歸於晉昔年齊桓公卒五公子爭立霸業遂廢今襄公克纘父功繼為盟主首能威服諸侯

叔孫得臣如京師

左傳曰毛伯衛來錫公命叔孫得臣如周拜高郵孫氏曰魯公

即位未嘗如周而周錫之命受命矣又不自行而使臣往不臣之甚也

衛人伐晉

衛以不事霸主受伐喪邑而又報伐焉見謀國者之非也

秋

公孫敖會晉侯于戚

左傳曰晉侯疆戚田故公孫敖會之澄按卿不會公侯凡

魯卿會外君直書不隱以見其非杜氏曰戚衛邑在頓丘衛縣西

冬

十月

丁未楚世子商臣弑其君頹

頹威倫切公穀作髡左傳曰楚子將以

商臣為太子訪諸令尹子上子上曰君之齒未也而又多愛黜乃亂也楚國之舉恒在少者且是人

也遽目而豺聲忍人也不可立也弗聽既又欲立王子職而黜太子商臣商臣聞之而未察告其師潘崇曰若之何而察之潘崇曰享江芊而勿敬也從之江芊怒曰呼役夫宜君王之欲殺女而立職也告潘崇曰信矣潘崇曰能事諸乎曰不能能行乎曰不能能行大事乎曰能以宮甲圍成王王請食熊蹯而死弗聽王縊易曰臣弑其君子弑其父非一朝一夕之故其所由來者漸矣胡氏曰考於傳之所載可以見其所由致之漸嫡妾必正而楚子多愛立子必長而楚國之舉恒在少者養世子不可以不慎也而以潘崇為之師侍膳問安世子職也而多置宮甲降而不憾憾而能眈者鮮矣乃欲黜兄而立其弟謀及婦人宜其敗也而使江芊知其情其及宜矣楚願僭王憑陵中國戰勝諸侯毒被天下然昧於君臣父子之道禍發蕭牆而不之覺也不善之積豈可揜哉春秋書世子弑其君

者推本所由而著其首惡為萬世之大戒也唐世子弘受左氏春秋至此廢書嘆曰經籍聖人垂訓何書此耶郭瑜對曰春秋以善惡為勸戒故商臣千載而惡名不滅弘曰非唯口不可道故亦耳不忍聞願受他書瑜請讀禮世子從之嗚呼聖人大訓不明於後世皆腐儒學經不知其義者之罪夫亂臣賊子雖陷阱在前斧鉞加頸而不避顧謂身後惡名足以懲其為惡豈不謬哉持此曉人可謂茅塞其心矣若語之曰為人君父而不通於春秋之義者必蒙首惡之名為人臣子而不通於春秋之義者必陷篡弑誅死之罪聖人書此者使天下後世知所以為君臣父子之道而免於首惡之名誅死之罪也世子弘而聞此必將慊然畏懼知春秋之不可不學矣學于春秋必明臣子之義不至於奏請怫旨而見耽矣

公孫敖如齊

左傳曰穆伯如齊始聘焉禮也凡君即位卿出並聘踐修舊好要結外援

好事隣國以衛社稷
忠信卑讓之道也

經書月四書日三大衍歷正月甲子大甲申冬至
二月甲午小三月癸亥大日食經書二月朔食蓋
長歷自隱元年至今三十四閏大衍三十六閏故
也四月癸巳小丁巳二十五日五月壬戌大傳云
辛酉朔差一日六月壬辰小七月辛酉大八月辛
卯小九月庚申大十月庚寅小丁未十八日十一
月巳未大十二月己丑大戊午小雪閏月己未小
長歷是年閏三月左氏曰於是閏三月非禮也諸
歷是年皆置閏而不當在三月爾
丁巳四月二十七丁未十月二十

二年

丙申襄王二十七年○晉霸襄三○蔡莊二十
一○曹共二十八○衛成十○鄭穆三○陳共

七○杞桓十二○宋成十二○齊昭八
○秦穆三十五○楚穆王商臣元年

春

王二月

甲子晉侯及秦師戰于彭衙秦師敗績

左傳曰殽之役晉人

既歸秦帥秦大夫及左右皆言於秦伯曰是敗也
孟明之罪也必殺之秦伯曰是孤之罪也復使為
政秦孟明視帥師伐晉以報殽之役晉侯禦之先
且居將中軍趙衰佐之王官無地御戎狐鞠居為
右及秦師戰於彭衙秦師敗績杜氏曰彭衙秦地
馮翊郃陽縣西北有彭衙城杜氏諤曰按左氏殽
之役晉獲秦三帥舍之歸秦秦伯不替孟明而用
之今師師報役此秦不量力以勞民自取其敗

丁丑作僖公主

穀梁傳曰譏其後也范氏曰薨至此已十五月張氏曰事亡如事存

故作主以象神而祭之禮既葬作主於墓不終日而虞祭不忍一日忘親也僖公元年四月葬今乃作主慢而違禮甚矣

三月

乙巳及晉處父盟

左傳曰晉人以公不朝來討公如晉晉人使陽處父盟公以恥

之陸氏曰義同高侯凡大夫與公盟若非彼疆逼我而盟例但書人言非大夫之罪也今晉逼公令與大夫盟故特書其名以見其罪處父書字蓋未命也猶公子翬初不書氏後書公子也不書地在晉都澄按未命謂未三命也次年敕江書陽處父豈今年再命明年乃三命歟或是處父上傳寫闕

陽字杜氏諤曰處父來魯而就魯盟左氏穀梁又以公如晉言之是妄生經外之說

夏

六月

公孫敖會宋公陳侯鄭伯晉士穀盟于垂隴隴公

斂○左傳曰穆伯會諸侯及晉司空士穀盟於垂隴晉討衛故也陳侯為衛請成於晉執孔達以說澄按卿與君盟會例降稱人不沒其氏名者非之也魯以公孫敖抗三國之君晉以士穀主盟皆非禮也故書以譏之衛敢於伐盟主者孔達之罪也今陳侯為請而執孔達衛服其罪故免於晉之伐也襄陵許氏曰元年衛人伐晉至是諸侯會盟而明年衛人會晉伐沈則知衛服於垂隴之會矣晉

襄方惠秦楚遵養中國罪苟有所委斯受之矣杜氏曰垂隴鄭地滎陽縣東有隴城

自十有二月不雨至于

秋

七月穀梁傳曰歷時而言不雨文不憂雨也不憂雨者無志乎民者也胡氏曰書不雨至于秋七月而不曰至于秋七月不雨者蓋後言不雨則是冀望欲雨之辭而非文公之意也夫書不雨至秋七月即八月嘗雨矣而不書八月雨見文公不以民事繫憂樂也其急于政可知杜氏謬曰春秋僖公書不雨者三文公亦書不雨者三而穀梁解之特異且春秋編年必具四時一時無事則書首月以備之是以僖二年冬十月不雨三年春王正月不雨夏四月不雨春秋所以析而言之者蓋不

可闕首月以備四時也今文公此年書十二月不雨至于秋七月者蓋冬夏自有異事以備四時也十年十三年正月不雨至于秋七月者其年之夏亦有異事故不復出首月不雨之文也穀梁以二公所書之異曲生外意謂僖公閔雨有志於民文公不憂雨無志乎民穀梁之意賢僖公而生此說也

八月

丁卯大事于太廟躋僖公

公羊傳曰大事者大祫也毀廟之主未毀廟之

主皆合食于太祖躋升也升僖公逆祀也先禰而後祖也左傳曰於是夏父弗忌為宗伯尊僖公曰躋聖賢明也君子以為失禮禮無不順子雖齊聖不先父食祀國之大事而逆之可謂禮乎澄曰凡

四時之祭稱祭名而曰烝曰嘗者五廟各祭也曰有事于太廟者四廟之主遷於太廟而合祭也是為祫曰大事於太廟者毀廟之主亦與祭自伯禽以下祖廟以上之主皆合祭於太廟也是為大祫諸侯有祫無大祫今魯亦大祫者成王賜魯重祭故魯得僭用天子之禮也文公欲尊其父故升僖公之神主設位於閔公之上也夫僖之於閔屬則弟兄分則君臣魯為君臣義同父子閔猶父也僖猶子也子雖齊聖不先父食今躋僖於閔之上是先子後父也故曰逆祀按僖公之喪此年十二月方再期而祥此八月大事於太廟是喪制未終而行吉祭也譏吉祭又譏逆祀也

冬

晉人宋人陳人鄭人伐秦

左傳曰晉先且居宋公子成陳轅選鄭公子歸

生伐秦取汪及彭衙而還程子曰秦以忿取敗晉可以已矣而復伐秦報復無已殘民結怨澄按先且居將中軍則三命之卿蓋遣其偏裨與三國之微者往伐故皆稱人

公子遂如齊納幣

僖公以十二月薨此二年十二月始大祥而行納幣禮是在喪

而圖昏未祥而行嘉禮也非禮故書

經書月五書日四大衍歷正月戊子大巳丑冬至二月戊午小經八月甲子丁丑皆在此月三月丁亥大乙巳十九日四月丁巳小五月丙戌大六月丙辰小七月乙酉大八月乙卯小丁卯十三日九月甲申大十月甲寅小十一月癸未大十二月癸丑小長歷是年閏正月甲子正月九日丁丑二十日乙巳三月二十日丁卯八月十五日

三年

丁酉襄王二十八年。晉霸襄四。蔡莊二十。曹共二十九。衛成十一。鄭穆四。陳

共八。杞桓十三。宋成十三。齊昭九。秦穆三十六。楚穆二。

春

王正月

叔孫得臣會晉人宋人陳人衛人鄭人伐沈沈潰

沈尸稔切。左傳曰以其服於楚也。杜氏曰汝南平輿縣北有沈亭。張氏曰沈姬姓國。漢志汝南治平輿。故沈子國。今屬蔡州。胡氏曰五國皆稱人將。非命卿也。沈在汝南。未嘗與中國會盟。師入其境。而人民逃散。常山劉氏曰一被侵伐。而人民散。君之不能可知矣。蔡漬沈潰許漬是也。

夏

五月

王子虎卒

王子者王之子非氏也虎名也王子虎盟翟泉稱王人則是王朝一命之下士

也今稱名者以王子之貴同於再命故稱名王臣無外交今以其嘗與魯同盟而來赴非禮也故書以譏

秦人伐晉

左傳曰秦伯伐晉濟河焚舟取王官及郊晉人不出遂自茅津濟封穀尸而還

張氏曰秦穆公既歸自穀而作秦誓矣然彭衙及此役猶以報復為事豈非悔過之心不能勝其恥敗之心而至

此乎

秋

楚人圍江

自齊桓之霸江黃以近楚之國而從齊故楚憾之之深前既滅黃矣而未加兵

於江者蓋江猶能自守其國也故至今年始有圍江之師

雨螽于宋

雨于付切○陸氏曰自空而下又多相似雨也

冬

公如晉

二年之春晉討公之不朝而有處父盟公之辱矣今年冬乃朝晉也

十有二月

己巳公及晉侯盟

左傳曰晉人懼其無禮於公也請改盟澄按舊說謂上年公朝

晉使處父盟公晉自悔其無禮故請公再朝晉侯
自與公盟以釋前非也杜氏謬曰按經二年書及
晉處父盟左傳以為公如晉而處父盟之經無其
文此年書公及晉侯盟經自有公如晉之文也則
是二年公未嘗如晉盟矣但晉人以公不朝使處
父來討而處父輒與公盟也今公如晉朝而至己
巳之日公及晉侯盟經文簡直易曉左氏以為晉
懼無禮而請改盟謂公再如晉是飾辭過實亦近
誣矣

晉陽處父帥師伐楚以救江

公穀無以字。左傳曰門于方城遇息公

子朱而還澄按江以從中國而受楚之伐中國霸
主之所當救也陽處父畏楚兵之彊不敢徑趨江
之城下乃揚言伐楚以救江門於方城一見息公
子朱來即避之而還師既不能救江又不救伐楚

其為畏楚也明矣胡氏曰楚嘗伐鄭矣齊桓公遠
結江黃合九國之師於召陵然後伐鄭之謀罷又
嘗圍宋矣晉文公許復曹衛會四國之師於城濮
然後圍宋之役解今江國小而弱非能與宋鄭比
楚人圍之必不待徹四境屯戍守禦之衆與宿衛
盡行也當是時楚有覆載不容之罪晉主夏盟宜
合諸侯聲罪致討命秦甲出武關齊以東兵畧陳
蔡而南處父等軍於方城之外楚必震恐而江圍
自解矣計不出此乃獨遣一軍遠攻強國豈能濟
乎故書伐楚以救江言救江雖善而所以救之者
非其道矣

經書月三書日一大衍歷正月壬午大甲午冬至
二月壬子小三月辛巳大四月辛亥小五月庚辰
大六月庚戌大七月庚辰小八月己酉大九月己
卯小十月戊申大十一月戊寅小十二月丁未大

己巳二十三日長歷
十二月二十四日

四年

戊戌襄王二十九年。晉霸襄五。蔡莊二十
三。曹共三十。衛成十二。鄭穆五。陳共

九。杞桓十四。宋成十四。秦
穆三十七。齊昭十。楚穆三

春

公至自晉

孫氏曰自是公朝彊國皆至者惡其輕
去宗廟遠朝彊國或執或辱危之也孫

氏覺曰文之出六至之者四
危之也不至者二安之也

夏

逆婦姜于齊

穀梁傳曰其逆者誰也公也親迎而
稱婦為其成禮於齊也趙氏曰公自

逆常事不書以成禮于齊所以變文曰逆婦以譏之
澄按婦人之歸夫家在途稱女既至稱婦逆而稱婦又曰于齊是成夫婦之禮于齊也故穀梁云何其速婦之也不稱夫人者夫人乃臣子稱其小君之辭非夫人之所得稱也公自逆故不稱夫人

狄侵齊

襄陵許氏曰狄自箕之敗至是始復侵齊間晉有秦楚之難也

秋

楚人滅江

三年之秋楚人圍江晉人陽為救之名而無救之之實江之受圍周一暮而

其國竟滅晉霸不競而蠻荆得以肆其虐於小國可哀也夫

晉侯伐秦

左傳曰晉侯伐秦圍邢新城以報王官之役胡氏曰晉人三敗秦師秦取王官

及郊未至結怨如晉師之甚也襄公又報之過矣

衛侯使甯俞來聘

按左氏所載晉文公之季年諸侯朝晉衛成公獨不朝又使孔

達侵鄭伐綿訾及匡晉襄公既祥使告於諸侯而伐衛圍戚取之衛不服罪而孔達敢伐霸主其明年晉會諸侯于垂隴將伐衛幸得陳侯為之請成執孔達以說于晉而衛遂得免於伐自孔達遭報之後蓋甯俞代之為政至次年春衛從晉伐沈自此衛服霸主而無事矣又次年春晉遂歸孔達其夏衛侯朝晉至秋而來聘魯焉事大睦鄰以安社稷或者皆出甯俞之謀也夫子所稱其知之可及者蓋如此

冬

十有一月

壬寅夫人風氏薨

杜氏曰僖公母風姓也。啖氏曰成風以後，妾母皆僭用夫人禮。

程子曰：妾母稱夫人，嫡妾亂矣。仲子始僭，猶未敢同嫡也。胡氏曰：風氏，僖公之母，莊公妾也。邦君之妻，曰夫人，蓋敵體之稱也。若夫妾媵，則非敵矣。其生亦以夫人之名稱號之，其死亦以夫人之禮卒。其所以非所以正其分也。以妾媵為夫人，徒欲尊寵其所愛而不虞卑其身，以妾母為夫人，徒欲崇貴其所生而不虞賤其父。卑其身則失位，賤其父則無本。越禮至是不亦悖乎？夫禮庶子為君，為其母無服，不敢二尊者也。春秋於成風記其卒葬，各以實書，謹禮之所由變也。

經書月一書日一大衍歷正月丁丑，小己亥，冬至二月丙午，大三月丙子，小四月乙巳，大五月乙亥。

小六月甲辰大七月甲戌小八月癸卯大壬申大暑
閏月癸酉大九月癸卯小癸卯處暑十月壬申

大十一月壬寅小旦日壬寅十二月辛未
大長歷是年閏三月壬寅十一月三日

五年己亥襄王三十年○晉霸襄六○蔡莊二十四
曹共三十一○衛成十三○鄭穆六○陳共

十○杞桓十五○宋成十五○齊
昭十一○秦穆三十八○楚穆四

春

王正月

□王使榮叔歸含且贈

含戶暗切贈芳歸切○公羊傳曰含者口實也杜氏曰珠

王曰含車馬曰贈胡氏曰含且贈者厚禮妾母也
程子曰天子成妾母為夫人亂倫之甚澄曰榮氏

叔字王朝四
命之大夫

三月

辛亥葬我小君成風

陸氏曰自文公葬成風之後乃有二夫人祔廟非禮也蘇

氏曰仲子非是惠公之嫡故特為之宮而不祔不書其葬蓋禮之正也自成風以來妾母皆葬蓋祔也魯禮之變自此始矣

□王使召伯來會葬

召穀作毛○胡氏曰歸舍且贈施於妾母已稠疊矣又使卿來

會葬恩數有加焉舍賜而葬其事並隆亂人倫廢王法甚矣澄曰召邑伯爵王朝六命之卿

夏

公孫敖如晉

三年之冬文公朝晉今五年之夏卿往聘焉魯之謹於事霸主也

秦人入郿

郿音若○左傳曰郿秦即秦又或於楚張氏曰今襄陽宜城縣地有郿故城

秋

楚人滅六

左傳曰楚成大心仲歸帥師滅六公子變滅蓼滅文仲間六與蓼滅曰皋陶庭

堅不祀忽諸德之建民之無援哀哉張氏曰六國皋陶之後杜氏曰今廬江六縣任公輔曰地譜壽州安豐縣有六國故城澄曰晉襄公之死期將及故其志氣不能如初年之盛紹霸之業浸以衰微故西戎之秦南蠻之楚敢於肆行中國吞噬小國而無所忌也

冬

十月

甲申許男業卒

許僖公也在位三十三年子錫我嗣是為昭公

經書月三書日二大衍歷正月辛丑小乙亥冬至
二月庚午大三月庚子小辛亥十二日四月己巳大
五月己亥小六月戊辰大七月戊戌小八月丁卯
大九月丁酉小十月丙寅大甲申十九日十一月
丙申小十二月乙丑大長歷辛亥
三月十三日甲申十月二十日

六年

庚子襄王三十一年。晉霸襄七卒。蔡莊二
十五。曹共三十二。衛成十四。鄭穆七。

陳共十一。杞桓十六。宋成十六。
齊昭十二。秦穆三十九。楚穆五。

春

葬許僖公

夏

季孫行父如陳

左傳曰臧文仲以陳衛之睦也欲求好於陳季文子聘於陳且娶焉

澄按此亦行父欲迎婦於陳而請於君借聘禮以行而已魯陳前此未嘗有邦交也

秋

季孫行父如晉

左傳曰季文子將聘於晉使求遭喪之禮以行其人曰將焉用之文

子曰豫備不虞古之善教也求而無之實難過求何害澄按三年之冬公朝晉五年之夏而卿聘今六年之秋卿又聘而問疾焉魯事霸主之勤如此

八月

乙亥晉侯驩卒

驩公作謹。晉襄公也在位七年。初欲立公子雍。不果。嫡子夷皋嗣。

是為靈公

冬

十月

公子遂如晉

杜氏曰卿共葬事

葬晉襄公

不書日闕

晉殺其大夫陽處父

左傳曰晉蒐于夷。舍二軍。使狐射姑將中軍。趙盾佐之。陽

處父至自溫改蒐于董易中軍陽子成季之屬也故黨於趙氏且謂趙盾能曰使能國之利也是以上之宣子於是乎始為國政賈季怨陽子之易其班也而知其無援於晉使續鞠居殺陽處父穀梁傳曰晉將使狐夜姑為將軍趙盾佐之陽處父曰不可襄公曰諾謂夜姑曰吾使盾佐汝今汝佐盾矣襄公死處父主竟上之事夜姑使人殺之公羊傳曰晉殺其大夫陽處父射姑殺也射姑殺其稱國以殺何君漏言也胡氏曰凡書殺者在上則稱君在下則稱氏在衆則稱人在微則稱盜君與臣同殺則書國今殺處父者射姑耳君獨以漏言故亦預殺焉張氏曰按左氏則若晉國之事一聽於陽處父者及考穀梁氏所謂君漏言則是易中軍乃陽處父密言於襄公公不能謹而輕漏之以致狐射姑之殺處父春秋所以分其殺於君與大夫也澄按是時襄公已卒矣而書國殺者經意若曰

處父今日之死由襄公漏言之故實襄公殺之也

晉狐射姑出奔狄

射音亦殺作夜。左傳曰晉殺續簡伯賈季奔狄宣子使史駢

送其帑與其器用財賄至諸竟

閏月不告朔猶朝于廟

左傳曰閏以正時時以作事不告閏朔棄時政也李

克俞曰古歷十九年為一章章有七閏八章三年閏九月六年閏六月九年閏三月十一年閏十一月十四年閏八月十七年閏四月十九年閏十二月此擬元首初章若於後漸積餘分大率三十二月則置閏不必同初章凡為歷者閏前之月中氣在晦閏後之月中氣在朔若歷不置閏則弦望晦朔皆非其正故書云以閏月定四時成歲天子閏月則聽朔於明堂闔門左扉立於其中故於文王

在門為閏天子有閏月聽朔之禮諸侯從可知也
趙氏曰天子常以今年冬頒明堂正朔於諸侯諸
侯受之每月奉月朔甲子以告于廟所謂稟正朔
也文公以閏非正不行告朔之禮而以其朔日但
身至廟拜謁而已故曰猶朝於廟杜氏諤曰子貢
欲去告朔之餼羊子曰賜也爾愛其羊我愛其禮
文公既不告朔而但至廟拜謁春秋志文公廢告
朔而猶朝廟是幸其禮不盡廢聖人愛禮之深意
也

經書月三書日一大衍歷正月乙未大庚戌冬至
二月乙丑小三月甲午大四月甲子小五月癸巳
大六月癸亥小七月壬辰大八月壬戌小乙亥十
四日九月辛卯大十月辛酉小十一月庚寅大十
二月庚申小長歷是年閏十二月乙亥八月十五
日程氏公說曰歷法是年未應閏經書閏月則周

閏有所移也

七年

辛丑襄王三十二年。晉霸靈公夷臯元年。蔡莊二十六。曹共三十三。衛成十五。鄭

穆八。陳共十二。杞桓十七。宋成十七。卒。齊昭十三。秦康公瑩元年。楚穆六

春

公伐邾

左傳曰公伐邾間晉難也杜氏曰公因霸國有難而侵小

三月

甲戌取須句遂城邾

句其俱切邾音吾。左傳曰寘文公子焉澄按邾人嘗滅

須句須句子奔魯僖公二十二年伐邾取須句而反其君其年秋邾人以須句故伐魯戰於升陘而

魯敗邾人復取須句至今年十八年矣文公乃又伐邾而取須句邾文公之子前叛邾而在魯故公命之為守須句之大夫僖公前取須句之後邾人旋來伐魯今文公再取須句疑邾之又来伐而爭也故既使邾之叛臣守須句矣又城邾邑以備邾師之至也杜氏曰邾魯邑卞縣南有郛城張氏曰邾今屬襲慶府泗水縣

夏

四月

宋公王臣卒

宋成公也在位十七年其弟禦殺世子而自立國人殺禦而立其少子杵

臼是為昭公

宋人殺其大夫

左傳曰於是公子成為右師公孫友為左師樂豫為司馬鱗矐為司

徒公子蕩為司城華御事為司冠昭公將去羣公子樂豫曰不可公族公室之枝葉也若去之則本根無所庇蔭矣不聽穆襄之族率國人以攻公殺公孫固公孫鄭於公宮杜氏曰二子在公宮為亂兵所殺澄按穆襄之族率國人人眾非一人也故稱宋人死者不幸而遭亂兵非有可殺之罪故不稱名陸氏曰非君意而殺之者罪不可書名特加人字以別之胡氏曰國亂無政衆人擅殺之也

戊子晉人及秦人戰于令狐

左傳曰秦康公送公子雍于晉曰文公之

入也無衛故有呂卻之難乃多與之徒衛穆嬴日抱太子以啼於朝曰先君何罪其嗣亦何罪舍嫡嗣不立而外求君將焉寘此宣子諸大夫皆患穆嬴且畏逼乃背先蔑而立靈公以御秦師及董陰

宣子曰我若受秦秦則賓也不受冠也既不受矣而復緩師秦將生心先人有奪人之心軍之善謀也逐冠如追逃軍之善政也訓卒利兵秣馬蓐食潛師夜起敗秦師於殽張氏曰令殽晉地今河中府猗氏縣有令殽城澄按帥師者晉趙盾送公子雍者秦康公二國有君有卿在而各使裨將帥偏師以戰故言晉人秦人

晉先蔑奔秦

蔑公作昧下有以師字○左傳曰先蔑之使也荀林父止之曰夫人太子

猶在而外求君此必不行子以疾辭若何不然將及攝卿以往可也何必子吾嘗同寮敢不盡心乎弗聽及亡荀伯盡送其帑及其器用財賄於秦曰為同寮故也穀梁傳曰不言出在外也孫氏曰自軍中而往也

狄侵我西鄙

張氏曰間秦晉之爭襄陵許氏曰狄懲其之敗四年間一侵齊而未敢肆

至是始復侵魯侵齊侵宋
侵衛晉襄既沒莫之忌矣

秋

八月

公會諸侯晉大夫盟于扈

左傳曰晉侯立故也杜氏曰扈鄭地滎陽卷縣

西北有扈亭張氏曰今之鄭州原武縣襄陵許氏曰諸侯何以不序大夫何以不名大夫而主盟諸侯自扈之會始也高郵孫氏曰春秋書及某大夫盟者唯二莊公九年公及齊大夫盟于莒及此年是也澄按經書諸侯者皆前目後凡此年以前並無諸國之目若無左傳則不知其為齊宋衛陳鄭

許曹七國之君不列叙諸國而但言諸侯以無盟主而大夫強合諸國之君故畧之也晉大夫者趙盾也莊公九年書齊大夫時襄公已弑桓公未入齊無君常國大夫自為主而與莊公盟故不書氏名而但曰齊大夫此年書晉大夫時趙盾迎立公子雍靈公未立晉未有君趙盾自為主而與七國盟故亦未書氏名與前書齊大夫同以見趙盾自專國故擅廢置君襄公卒已期年而嗣君猶未正位蓋盟扈之後始立靈公也

冬

徐伐莒

高氏曰徐本戎也厥後自進於中國數與中國諸侯盟會僖十五年楚人伐徐齊桓

為之大合中國諸侯以救之為其能去逆効順不侵犯中國故也今輒興兵而伐莒以中國無盟主

是以敢爾故聖人復外之也

公孫敖如莒涖盟

左傳曰穆伯娶于莒曰戴己生文伯其娣聲己生惠叔戴己卒

又聘于莒莒人以聲己辭則為襄仲聘焉莒人來請盟穆伯如莒涖盟且為仲逆自為娶之仲請攻之叔仲惠伯諫曰兵作于內為亂今臣作亂而君不禁若之何公止之惠伯成之使仲舍之公孫敖反之澄按魯臣每欲娶婦必請於君行聘會之禮假公事以遂其私君之無政臣之無禮也况敖代為弟逆名猶不正卒以淫奔禽獸之行也高氏曰莒為徐所伐故來求援而請脩泚之盟公孫敖娶于莒故許其盟而請往涖之

經書月三書日二大衍歷正月己丑大乙卯冬至二月己未小經二月甲戌在此月三月戊子大

月戊午大丙戌春分閏月戊子小經四月戊子在
此月五月丁巳大旦日穀雨六月丁亥小七月丙
辰大八月丙戌小九月乙卯大十月乙酉小十一
月甲寅大十二月甲申小長歷甲戌三月十八日
戊子四月二日

八年

壬寅襄王三十三年崩。晉霸靈二。蔡莊二
十七。曹共三十四。衛成十六。鄭穆九。○

陳共十三。杞桓十八。宋昭公杵臼
元年。齊昭十四。秦康二。楚穆七。

春

王正月

夏

四月

秋

八月

戊申天王崩

襄王也在位三十三年
世子王臣嗣是為頃王

冬

十月

壬午公子遂會晉趙盾盟于衡雍

雍於用切。左傳曰襄仲會趙

孟報扈之盟也。澄按上年公既與趙盾盟于扈矣。趙盾以魯國之權在公子遂而不在文公故必致

公子遂盟于衡雍而後信也任氏曰二國之用事者會盟政在大夫矣張氏曰衡雍鄭地滎陽卷縣故城在今鄭州原武東與扈相近後漢河南卷縣有垣雖城古衡雍也

乙酉公子遂會雒戎盟于暴

雒戎左一作伊雒之戎公作伊雒戎○左

傳曰遂會雒伊之戎僖公十一年傳云揚拒泉臯伊雒之戎同伐京師杜氏曰雒戎居伊水雒水間者杜氏謂曰左傳以會雒戎為遂事孫氏曰再言公子遂非繼事也澄按壬午會趙盾趙四日乙酉盟雒戎非歸魯而再出蓋初出之時已擬行此二事故經作二事書之

公孫敖如京師不至而復

至下公無而字

丙戌奔莒

左傳曰穆伯如周弔喪不至以幣奔莒從己氏馬公羊傳曰不言出在外也穀

梁傳曰不言所至未如也未如則未復也未如而
曰如未復而曰復其如非如也其復非復也惟奔
莒之為信孫氏曰如京師弔喪也不至而復中道
而反也宣八年公子遂如齊至黃乃復以疾而還
義猶不可況教如京師弔喪中道而返乎張氏曰
國君為天子斬衰公孫教受命以赴天王之喪廢
君命而返已為不赦之罪況懷桑中之行而淫奔
乎文公容其復而奔魯之無政刑也陸氏曰還者
事畢復者未畢師還公還自晉歸父還自晉士匄
聞齊侯卒乃還故曰還事畢也公如晉至河乃復
公孫教如京師不至而復仲遂
至黃乃復皆事未畢而復也

各

宋人殺其大夫司馬宋司城來奔

左傳曰宋襄夫
人襄王之姊也

昭公不禮焉夫人因戴氏之族以殺大司馬公子
印司城蕩意諸來奔程子曰宋王者後得自命官
故獨宋卿書官張氏曰司城澄按宋人者戴氏之族非一
司空諱之故曰司城澄按宋人者戴氏之族非一
人也見宋昭公無政而臣庶得以擅殺大夫也諸
侯大國三卿曰司徒司馬司空當時諸國皆不遵
王制改其官名宋亦改司徒曰太宰唯司馬司城
尚是舊名故春秋每書宋二官必存其官號以幸
王制之猶未改也不書氏
名死者無罪例已見前

經書月四書日四大衍歷正月癸丑大庚申冬至
二月癸未小三月壬子大四月壬午小五月辛亥
大六月辛巳大七月辛亥小八月庚辰大戊申二
十九日九月庚戌小十月己卯大壬午四日乙酉
七日丙戌八日十一月己酉小十二月戊
寅大長歷戊申八月晦壬午十月五日

九年

癸卯項王元年。晉霸靈三。蔡莊二十八。曹共三十五卒。衛成十七。鄭穆十。陳共

十四。杞桓十九。宋昭二。齊昭十五。秦康三。楚穆八。

春

毛伯來求金

左傳曰不書王命未葬也杜氏曰求金以供葬事雖踰年而未葬故不稱

王使澄曰天子之喪百官總己以聽於冢宰三年故王不出命也與隱三年武氏子來求購同毛邑

伯爵王朝
六命之卿

夫人姜氏如齊

趙氏曰無父母而歸寧譏也澄按出姜當是齊昭公之女而趙氏以

為無父母蓋謂歸寧合禮者經不書故疑其非昭公之女歟

二月

叔孫得臣如京師

葬天王也高郵孫氏曰春秋天王書葬者五君往者三臣往者

二君往者不書公如京師常事得禮法所當略也臣往者書其人以爲天王之喪君不自往而使臣焉則是忘君父之禮恩廢臣子之禮

辛丑葬襄王

公羊傳曰王葬不及時書過時書我有往者則書

晉人殺其大夫先都

左傳曰夷之蒐晉侯將登箕鄭父先都而使士穀梁益耳

將中軍先克曰狐趙之勲不可廢也從之先克奪蒯得田於莖陰故箕鄭父先都士穀梁益耳蒯得作亂使賊殺先克晉人殺先都梁益耳澄按先都下軍佐也襄公於夷之蒐將升之上軍以先克之

言而止故先都等陰使賊殺先克時靈公幼弱趙盾將中軍秉國政先克其佐也惡先都等使賊殺其佐不敢明正先都之罪而使羣下殺之故書衆殺而不書國殺也

三月

夫人姜氏至自齊

孫氏曰凡夫人出例皆不至惟此獨書至者以其如齊雖不合

禮然愈於文姜之如齊故於其歸也特書至以出行猶可以至也劉氏曰夫人曷為或至或不至出入以禮則可以至出入不以禮則不可至此其為有禮奈何父母在而歸寧也胡氏曰出姜如齊以寧父母於禮得矣其至者出姜蓋不安於魯故至而特書澄按或謂出姜無父母或謂出姜有父母兼存之以俟攷焉

晉人殺其大夫士穀及箕鄭父

王氏箋義曰晉自趙盾代士穀當國

諸大夫不平之至是謀亂大夫死者五人向若晉從其君之命士穀將中軍箕鄭父之徒各登其職則此亂無由而作矣故春秋原晉亂之本由趙盾之代為中軍帥也既書殺先都又書殺士穀箕鄭父蓋箕鄭之死由士穀之失職士穀之死由趙盾之代其位也然士穀之徒以失職而謀作亂其罪大矣時晉侯年幼政在宣子故皆不以累上書之而稱人以殺其言及箕鄭父者穀梁所謂累者是也先儒多不解所以稱人書及之旨故原而釋之胡氏曰稱人以殺者國亂無政衆人擅殺之之辭三大夫挾私怨而使賊殺其中軍佐固有罪矣當是時主幼不君政在趙盾而中軍佐者盾之黨也若穀有所歸則此三人者獨無可議從末減乎而皆殺之是大夫專生殺而政不自人主出也故不

稱國討常山劉氏曰殺二大夫以上不言及其事
同殺之之志均故也若晉之二趙二卻蔡之二公
孫是也書曰殺其大夫某及某者以某之故而延
及於某也若元咺信不臣矣而公子瑕不見其辜
衛侯遷怒而并殺之故書曰及以志專殺
之中又有輕重者也士穀及箕鄭父倣此

楚人伐鄭

左傳曰范山言於楚子曰晉君少不在
諸侯北方可圖也楚子師于狼淵以伐

鄭因公子堅公子廆及樂耳鄭及楚平孫氏曰楚
復彊也楚自城濮之敗不敢加兵於鄭今伐鄭者
晉文既死中國不振故也

公子遂會晉人宋人衛人許人救鄭

經所書四國
皆書人而左

氏以為晉趙盾宋華耦衛孔達蓋三卿皆當國主
兵者其時不親行而各使微者以將兵救鄭也張

氏曰楚自城濮以來不得志於中國其君臣之心未嘗一日忘也趙盾為政欲攘楚而大庇中夏正當力懲其始以振中國之威乃視為常役而緩不及事師及鄭而楚已囚鄭公子而去豈拯楚溺之哉舉

夏

狄侵齊

張氏曰楚得氣去而狄交侵矣書以病晉也

秋

八月

曹伯襄卒

曹共公也在位三十五年子壽嗣是為文公

九月

癸酉地震

公羊傳曰
記異也

冬

楚子使椒來聘

椒穀作楚。椒闔椒穀於菟之從子。楚卿再命者。張氏曰伐鄭而聘。

魯亦遠交
近攻之意

秦人來歸僖公成風之襚

杜氏曰衣服曰襚。追襚僖公并及成風。張氏曰

當是時秦楚交病。中國秦欲伐晉而歸襚于魯。猶楚欲圖北方而使椒來聘也。高氏曰僖公薨已九年。成風薨已四年。其葬既久而秦方以襚為名。將焉用之。成風於僖公雖曰母子而先君後夫人者。

禮當然也以過時
始至故曰來歸

卷六

葬曹共公

經書月四書日二大衍歷正月戊申小乙丑冬至
二月丁丑大辛丑二十五日三月丁未小四月丙
子大五月丙午小六月乙亥大七月乙巳小八月
甲戌大九月甲辰小十月癸酉大經九月癸酉在
此月朔十一月癸卯小十二月壬申大
長歷辛丑二月二十六日癸酉九月朔

十年

甲辰頃王二年。晉霸靈四。蔡莊二十九。
曹文公壽元年。衛成十八。鄭穆十一。陳

共十五。杞桓二十。宋昭三。
齊昭十六。秦康四。楚穆九。

春

王三月

辛卯臧孫辰卒

高氏曰此臧哀伯之孫臧文仲也孔子譏其竊位又譏其不仁者三

不智者三而魯人師其言以為死而不朽子許曰宣叔張氏曰文仲魯之名大夫也知柳下惠之賢而不與立自莊公末已與聞國政而四十餘年間國政多疵文公尤甚

夏

秦伐晉

秦下闕一字經七年書令狐之戰左氏載八年夏秦人伐晉取武城以報令狐之役

經不書又載今年春晉伐秦取少梁經亦不書此書秦伐晉秦晉交兵報復無已兩罪之也

楚殺其大夫宜申

左傳曰與子家謀弑穆王穆王聞之殺宜申高氏曰宜申字子

西亦城濮之敗將事弑君父之賊十年矣乃謀弑焉楚子聞而殺之亦可悲也已澄按商臣弑君父天地所不容宜申為工尹不能與同列共謀討賊乃北面而事之君臣之分已定而乃謀弑其義不足稱也然其謀不遂而身見死聖人不以其當受今將之誅而以國殺大夫為文其意深矣

自正月不雨至于

秋

七月

義已見前

及蘇子盟于女栗

女音汝。蘇邑子爵王朝四命之大夫受封而有國邑者孫氏

曰內不出主名徵者文公使徵者盟天子卿其惡可知澄按依趙氏例以及為公及之者是

冬

狄侵宋

高氏曰狄侵諸大國獨宋未爾自宋亂之後狄既侵之楚次厥貉又將來伐則國幾

亡矣

楚子蔡侯次于厥貉

厥公作屈○左傳曰陳侯鄭伯會楚子於息遂及蔡侯次

于厥貉將以伐宋宋華御事曰楚欲弱我也先為之弱可乎何必使誘我我實不能民何罪乃逆楚子勞且聽命高氏曰此楚子將求諸侯恐諸侯疑貳欲前而未敢也夫楚子者弑君父之賊而中國諸侯如宋陳鄭之君乃皆俛首而聽命焉聖人於此不從諸侯盟會之例而特書曰楚子蔡侯次于厥貉次者通疑不前之意著楚子包藏禍心欲憑陵諸夏而未敢遽前也唯蔡侯首附召亂故獨書

以均其罪厥後諸侯知中國之不可棄復同盟于
新城非若蔡侯之堅服楚也胡氏曰楚滅江六平
陳與鄭於是乎為伐宋之舉次于厥貉當是時陳
鄭皆從楚矣獨書蔡侯何哉鄭失三大夫侯救而
不獲陳獲公子茂而懼宋方有狄難蓋有不得已
者非所欲也蔡無四境之虞則是得已而不已故
削三國書蔡侯見其棄諸夏之惡也高郵孫氏曰
厥貉之次遂稱楚子而明年伐麋又以爵書自是
與中國等楚人盛彊
而中國之衰益甚矣

經書月二書日一大衍歷正月壬寅大辛未冬至
閏月壬申小二月辛丑大三月辛未小辛卯二十
一日四月庚子大五月庚午小六月己亥大七月
己巳小八月戊戌大九月戊辰小十月丁酉大十
一月丁卯小十
二月丙申大

十有一年

乙巳頃王三年。晉霸靈五。蔡莊三十。曹文二。衛成十九。鄭穆十二。陳

共十六。杞桓二十一。宋昭四。齊昭十七。秦康五。楚穆十。

春

楚子伐麇

麇九倫切。公作圖。左傳曰：厥貉之會。麇子逃歸。楚成大心敗麇師于防渚。潘

崇復伐麇。至於錫穴。襄陵許氏曰：楚侵伐書。爵始此中國。日替矣。高氏曰：中國諸侯自會。厥貉之後。皆不能加楚也。成三年會蜀之後。雖其大夫帥師。亦出主名。一同中國。蓋聖人悼中國無盟主。故不以蠻荒待之也。

夏

叔仲彭生會晉郤缺于承筐

公穀無仲字。左傳曰謀諸侯之從楚者

杜氏曰九年陳鄭及楚平十年宋聽楚命承筐宋地在陳留襄邑縣西張氏曰今拱州襄陵縣澄按其時楚日益彊晉君幼魯君怠將欲謀楚而乃以以次之大夫相會霸謀之不遠而楚勢之益張也宜哉彭生叔仲惠伯公子牙之孫蓋其適子之子以叔孫為氏此其支子之子故以叔仲為氏杜氏謂曰自文公之後大夫擅相為會者多矣春秋詳而志之

秋

曹伯來朝

左傳曰曹文公即位而來見也

公子遂如宋

左傳曰襄仲聘宋且言司城蕩意諸而復之因賀楚師之不害也

狄侵齊

高氏曰七年之間狄三侵齊非特齊之不競也亦當狄之方彊爾狄之強如此乃所

以大鹹之功也

冬

十月

甲午叔孫得臣敗狄于鹹

左傳曰鄭麟侵齊遂伐我公卜使叔孫得臣追

之吉侯叔夏御莊叔綿房甥為右富父終甥搃其喉以戈殺敗狄于鹹獲長狄僑如富父終甥搃其喉以戈殺之杜氏曰鄭麟狄國名防風氏之後漆姓鹹魯地啖氏曰不言獲其所獲者微爾高氏曰叔孫得臣最善射狄侵齊而復之魯叔孫得臣以一矢斃其首首故不言帥師春秋書敗狄者四皆不書戰不

待戰而敗之喜內勝之辭也劉氏曰非長狄乎曰非也春秋正名狄也戎也淮夷也白狄也赤狄也山戎也夷蠻也陸渾戎也姜戎也是不一名澄曰狄之中有長身者故號之曰長狄長狄即狄也非別有一國名長狄

經書月一書日一大衍歷正月丙寅小丙子冬至二月乙未大三月乙丑大四月乙未小五月甲子大六月甲午小七月癸亥大八月癸巳小九月壬戌大十月壬辰小甲午三日十一月辛酉大十二月辛卯小長歷甲午十月四日

十有二年

丙午頃王四年。晉霸靈六。蔡莊三十。一。曹文三。衛成二十。鄭穆十三。

陳共十七。杞桓二十二。宋昭五。齊昭十八。秦康六。楚穆十一。

春

王正月

郅伯來奔

郕公作盛。左傳曰：郕太子朱儒自安于夫鍾國人弗徇。郕伯卒，郕人立君。太

郕伯來奔于夫鍾國人弗徇郕伯卒郕人立君太
 子以夫鍾與郕邾來奔趙氏曰諸侯嗣位未踰年
 稱子鄭忽曹羈莒展皆已即位及其出奔猶但稱
 名豈有身未即位以邑出奔而稱郕伯一何厚誣
 耶劉氏曰意者先郕伯以去年卒太子即位而不
 能自安遂出奔孫氏曰諸侯播越失地皆名此不
 名者非自失國也按莊八年師及齊師圍郕郕降
 于齊師自是入齊為附庸此
 又來奔齊所偪爾故不名

杞伯來朝

左傳曰杞桓公
來朝始朝公也

二月

庚子子叔姬卒

趙氏曰時君之女故曰子以別非先君之女也澄按公穀二傳皆以

叔姬為文公同母之女弟如此則是先君之女非時君女也不當稱子而左傳又以為杞桓夫人蓋指僖三十一年杞伯姬所求之婦若果爾則非文之女矣杞桓乃魯莊之甥即位在魯文之先所娶決非魯文之女至成五年被出來歸八年卒于魯者乃是杞伯姬所求魯僖之女為杞桓夫人者也

夏

楚人圍巢

左傳曰羣舒叛楚子孔執舒子遂圍巢杜氏曰巢吳楚間小國巢廬江六縣東

有古巢城張氏曰今無為軍巢縣

秋

滕子來朝

左傳曰滕昭公來朝亦始朝公也

秦伯使術來聘

術公作遂○左傳曰秦伯使西乞術來聘且言將伐晉澄曰義見前

歸襁下

冬

十有二月

戊午晉人秦人戰于河曲

左傳曰秦伐晉取羈馬晉趙盾孫林父卻缺史

駢從秦師于河曲史駢曰秦不能久請深壘固軍以待之秦人欲戰秦軍掩晉上軍趙穿追之不及

反怒以其屬出宣子曰秦獲宰也獲一卿矣秦以勝歸我何以報乃皆出戰交綏秦師夜遁趙氏曰凡戰不書及交為主也高氏曰二國報怨償禍迭起師徒其罪均也不書敗者兩無敗也杜氏曰河曲在河東蒲坂縣南張氏曰今河中府河東縣南有河曲

季孫行父帥師城諸及鄆

鄆公作運後同。杜氏曰鄆莒魯所爭者城陽

姑幕縣南有員亭員即鄆也以其遠徧外國故帥師城之張氏曰諸見莊公二十九年註鄆魯之東鄆今鄆州須城縣也莒魯爭鄆蓋始於此前此莒未嘗與魯有爭且未嘗有事于鄆今行父帥師城二邑以起爭端魯自此與莒為讐由鄆始孫氏曰帥師而城畏莒故也杜氏諤曰春秋書城築二十九年而帥師城之者二此年及哀三年城啓陽也鄆者莒魯所爭之邑帥師以城之者懼不虞之難故

為之備也凡城築之事皆志重民
力也况帥師而城者乎勞民甚矣

經書月三書日二大衍歷正月庚申大辛巳冬至
二月庚寅小庚子十一日三月己未大四月己丑
小五月戊午大六月戊子大七月戊午小八月丁
亥大九月丁巳小乙酉處暑十月丙戌大乙卯秋
分閏月丙辰小十一月乙酉大旦日霜降十二月
乙卯小戊午四日長歷是年閏十二月庚子二月
十二日戊午
十二月五日

十有三年

丁未頃王五年。晉霸靈七。蔡莊三十
二。曹文四。衛成二十一。鄭穆十四

六。陳共十八。卒。杞桓二十三。宋昭
六。齊昭十九。秦康七。楚穆十二

春

王正月

夏

五月

壬午陳侯朔卒

陳共公也在位十八年
子平國嗣是為靈公

邾子蘧蒢卒

蘧其居切蒢丈居切○邾文
公也在位五十年子獲且嗣

自正月不雨至于

秋

七月

義見
前

世室屋壞

世左穀作大。○公羊傳曰：世室，魯公廟也。周公稱太廟，魯公稱世室，羣公稱宮。

世室，世世不毀也。屋壞，久不脩也。澄曰：世室，屋壞謂伯禽之廟，久不脩而屋壞也。周公封於魯，留相王朝而不適魯，使伯禽往就封。周公雖不適魯，然實為魯之始祖，故魯之太廟祀周公。百世不毀，伯禽雖代受封，然上有周公為之父，則不得為始封之君，其廟為昭之第一室。親盡則毀，蓋諸侯之禮。唯太廟不毀。二昭二穆皆四世而遞遷。周天子也。后稷居太廟，文王三分天下有其二，武王伐商而為天子。周之王業自文武始，故文武廟為宗，謂之世室。與太廟皆百世不毀。此天子之禮，非諸侯之所得僭也。成王賜魯重祭，俾太廟得用天子之禮，以祀周公。魯人以為伯禽為魯國始封之君，欲不毀其廟，故以伯禽之廟為世室。如周之文武僭用天子廟制，以尊伯禽，非禮也。魯文公怠慢不虔，久

不脩廟遂至屋壞聖人書之因以見魯公世室之
為非禮也與卜郊失禮郊牛有變而書以見魯郊
之為非禮者同世太二字多通用故左穀誤世為
太穀梁謂太室猶世室以為伯禽廟宇雖誤而義
則與公羊同杜氏以為太廟之室諸儒多從之夫
廟制其中之一室謂之太室稱太者以別於左右
二夾室書洛誥記成王祭文王武王而曰王入太
室裸彼文王武王廟非太廟也亦有太室何獨太
廟之室謂之太室乎且為人子孫不早脩廟以致
屋壞謂一廟之屋皆壞也若果是太廟屋壞當書
太廟屋壞今乃書太室屋壞則是太廟之中前堂
後寢左右夾室東西二廂之屋皆不壞而唯中閒
一室之屋獨壞也
於義有不通矣

冬

公如晉

左傳曰公如晉朝且尋盟

衛侯會公于沓

公無公字。左傳曰衛侯會公于沓。請平于晉。澄曰公往朝晉衛侯

要之于路而與公會于沓。欲因公以請平于晉也。

狄侵衛

晉不能霸故狄人屢肆其暴。因衛侯之出狄乘間侵之。

十有二月

己丑公及晉侯盟

公朝晉而請盟也。

公還自晉

公穀無公字。還者在路而未至國也。

鄭伯會公于斐

斐公作斐。左傳曰公還鄭伯會公亦請平于晉。公皆成之。澄曰公

未至魯鄭伯要之於路而與公會于柴也杜氏曰鄭衛貳于楚畏晉故因公請平柴鄭地高氏曰初衛鄭舍晉而從楚豈得已哉彊弱之勢不敵滅亡之微可待姑為一時之計爾而晉未之察季文子相魯侯為之請成以紓兩國之禍春秋善和難故詳志之且見公一出而二國附如此惜乎其自急也杜氏諤曰文公一出三為如晉朝也及晉侯盟也自往及還與二國會也

經書月四書日二大衍歷正月甲申大丙戌冬至二月甲寅小三月癸未大四月癸丑小五月壬午大壬午一日六月壬子小七月辛巳大八月辛亥小九月庚辰大十月庚戌大十一月庚辰小經十二月己丑在此月十二月己酉大

十有四年

戊申頃王六年崩不書。晉霸靈八。蔡莊三十三。曹文五。衛成二十二。鄭

春

穆十五。陳靈公平國元年。杞桓二十四。宋昭七。齊昭二十卒。秦康八。楚莊王旅元年。

王正月

公至自晉

邾人伐我南鄙

魯文公七年伐邾取須句疑邾之必來報伐也故城邾以備之然終

邾文公之世七年而不伐魯今嗣君即位始加兵於魯左傳謂公使人往弔不敬故邾來伐然邾小國也何至因弔喪使人之不敬而遽敢討魯乎蓋欲以報須句之役爾見魯未易攻故師至南鄙而過去也

叔彭生帥師伐邾

按十一年承筐之會左氏經文作叔仲彭生則此經叔下亦當

有仲字

夏

五月

乙亥齊侯潘卒

昭公也在位二十年其子舍嗣

六月

公會宋公陳侯衛侯鄭伯許男曹伯晉趙盾

癸酉同盟于新城

左傳曰從於楚者服且謀邾也張氏曰從楚者宋陳鄭許許自

文公圍之不服襄公又嘗伐之今始與會盟也自襄公之末楚再憑陵趙盾得政稍加和集去歲文公之朝衛鄭求附盾因此并招致久負固之許諸侯偕至然後講同盟之禮高氏曰去冬鄭衛皆因公而請平于晉至是諸侯之從楚者復附晉也諸侯始皆相會衆議既合而後盟且謀納捷菑焉故別書癸酉同盟澄曰同盟者莫適為主也是時晉靈公幼趙盾以當國大夫出會諸侯不敢主是盟故書同盟也杜氏曰新城宋地在梁國穀熟縣西

秋

七月

有星孛入于北斗

左傳曰周內史叔服曰不出七年宋齊晉之君皆將死亂杜氏

曰後三年宋弒昭公五年齊弒懿公七年晉弒靈公胡氏曰此三君皆違道失德而死于亂符叔服之言天之示人顯矣史之有占亦明矣孫氏曰孛孛之屬偏指曰孛光芒四出曰孛入于北斗者入魁中也

公至自會

晉人納捷菑于邾弗克納

捷公作接。左傳曰邾文公元妃齊姜生定公

二妃晉姬生捷菑文公卒邾人立定公捷菑奔晉晉趙盾以諸侯之師八百乘納捷菑于邾邾人辭曰齊出糴且長宣子曰辭順而弗從不祥乃還杜氏曰邾有成君晉趙盾不度于義而大興諸侯之師涉邾之境見辭而退雖有服義之善所興者廣所害者衆趙氏曰弗克納言失之於前而得之於

未愈乎
遂也

九月

甲申公孫敖卒于齊

左傳曰穆伯之從已氏也魯人立文伯文伯疾請曰穀之

子弱請立難文伯卒立惠叔穆伯求復惠叔以爲請許之將來卒于齊告喪請葬弗許陸氏曰奔大夫不書卒非我臣也既許其歸即我臣也故書之且明君臣之義死生一也魯卿卒於他國例也

齊公子商人弑其君舍

左傳曰子叔姬如齊昭公生舍叔姬無寵舍無威桓

公子商人驟施於國而多聚士昭公卒舍即位商人弑舍自立穀梁傳曰舍未踰年其曰君何也成舍之爲君所以重商人之弑也陸氏曰春秋之作本以懲姦惡若未踰年之君被弑而不曰君則逆

亂之臣皆以未踰年而肆其凶惡也晉奚齊本末
正又里克不代其位故異於此高郵孫氏曰人子
之心則未逾年而稱子國人弑君則未逾年而稱
君此春秋所以辨君臣之分而防篡弑之禍啖氏
曰舍母蓋魯之媵女但一叔姬爾左氏附會後事
加于字澄按啖說是也左氏附會加于字則叔姬
乃文公女也文公即位才十四年豈有女配齊昭
公而生子可立為君者哉齊昭公以魯僖公二十
八年即位叔姬生舍當在魯僖末年時文公尚為
世子豈有世子年幼而有女嫁鄰國年長之君為
夫人者乎况文四年文公逆婦姜于齊蓋齊昭公
之女也豈有齊昭既娶魯文之女而魯文又娶齊
昭之女者乎故知左氏以
舍母為文公女者妄也

宋子哀來奔

左傳曰宋高哀為蕭封人以為卿不
義宋公而出遠來奔孫氏曰子哀宋

公族子子姓哀名也澄曰子哀三命之卿例稱氏
稱名子氏哀名也宋子姓而氏曰子者所謂以姓
為氏也周制婦人稱姓男子稱氏再命者有名無
氏三命當稱氏則君命之氏宋哀自封人升為卿
君未及命氏而出奔故無氏可稱若但書名則疑
於再命而非三命之卿故經書宋之姓以為哀之
氏表其為三命之卿也傳稱高哀而經書子哀猶
晉大夫曰范氏中行而經所書皆以士為氏也張
氏曰自宋昭公在位始終無一善可稱大臣死禍
出奔者比比皆是獨子哀潔身而去不陷隕身濡
尾之悔觀蕩意諸再歸而卒不免則子
哀之見幾而作豈非既明且哲之流哉

冬

單伯如齊

單伯魯大夫之命於天子者自莊公元
年至今已七十餘年未必一人或其子

若孫
數

齊人執單伯

胡氏曰商人弑舍固忌魯矣魯使單伯如齊齊人欲辱魯故執單伯并執

叔姬而誣之以罪

齊人執子叔姬

陸氏曰左氏言子叔姬是齊侯舍之母春秋例無執本國人者左傳

誤此乃魯女嫁齊齊不受而執之爾公穀義是何氏曰時子叔姬嫁齊當為齊夫人使單伯送之澄按叔姬稱子則是時君之女左傳誤以為舍母澄已辨之矣當從公穀義及何休陸淳之說但公穀言道淫是以齊之誣辭為實何氏言單伯送叔姬亦非竊詳事意齊舍年幼新立急欲求配居喪而娶文公之女故其逆其歸皆不書姬歸當是九月之末至齊而舍已被弑姬無所從故十月之初魯遣

單伯往省商人固忌魯與舍為昏己既弑舍則又有所忌因單伯來省姬遂執單伯併姬而誣以曖昧之罪將以辱魯經書冬單伯如齊則是於叔姬歸齊之後如齊而非送叔姬也

經書月五書日三大衍歷正月己卯小壬辰冬至月戊申大三月戊寅小四月丁未大經五月乙亥在此月五月丁丑小六月丙午大癸酉二十八日七月丙子小八月乙巳大九月乙亥小甲申十月甲辰大十一月甲戌小十二月癸卯大長歷乙亥五月二十九日

十有五年

己酉匡王元年。晉霸靈九。蔡莊三十四。曹文六。衛成二十。鄭穆十六。

○陳靈二。杞桓二十五。秦康九。宋昭八。齊懿公商人元年。秦康九。楚莊二。

春

季孫行父如晉

左傳曰為單伯與子叔姬故也澄按齊商人有可討之罪而魯弱不

敢當齊之強使人與君女遭其執辱故上卿往聘於晉欲藉霸主之重請於齊以釋免其所執者也

三月

宋司馬華孫來盟

宋卿書官義已見前華孫督之後名耦氏而不名者四命之孫

卿與孔父蔡仲女叔同凡卿之不名者例書字父為最尊伯仲叔季次之稱孫者表其系亞於稱字者也趙氏曰不稱使與齊仲孫屈完義同從簡爾孫氏曰宋自僖公會諸侯於薄釋宋公之後未嘗與魯通問今華孫請來結盟于我以尋舊好啖氏曰凡不言君使者皆有義呂氏曰不言使自請之也高郵孫氏曰其君暗亂國事廢弛賢臣外奔華孫懼鄰國之諸侯因其間隙而侵伐之於是來盟

以紓其
國之難

夏

曹伯來朝

左傳曰諸侯五年再相朝杜氏曰十一年曹伯來朝至此五年乃來

齊人歸公孫敖之喪

左傳曰齊人或為孟氏謀曰魯爾親也飾棺寘諸堂卓魯

必取之從之卞人以告惠叔猶毀以為請立于朝以待命許之取而殯之齊人送之澄謂敖之喪得歸者以難之孝也

六月

辛丑朔日有食之鼓用牲于社

左傳曰非禮也日有食之天子不舉

伐鼓于社諸侯用幣于社伐鼓于朝齊氏指要曰莊二十五年鼓用牲于社傳云非常此稱非禮者前傳既非正陽之月時歷差誤則稱非常此年得當鼓之月但用幣非禮故傳變文言非禮也日有食之天子伐鼓于社責羣陰也諸侯用幣于社者社尊於諸侯故請教而不敢責之但伐鼓于朝自責其政事有闕謫于天爾

單伯至自齊

高氏曰內大夫為它國所執而見釋者皆書其至

晉卻缺帥師伐蔡

戊申入蔡

左傳曰新城之盟蔡人不與晉卻缺以上軍下軍伐蔡曰君弱不可以急入蔡

以城下之盟而還高氏曰蔡侯既與楚子次于厥貉故新城之盟不與焉晉卻缺帥師伐之斯有名

矣凡伐不言入伐之不服然後入焉蔡雖附楚楚人不之救足以知楚之不足恃矣雖蔡人自取之然晉曾不脩所以服楚而暴小國以爭諸侯欲使區區之蔡捍楚之強而不貳則亦難矣是歲蔡侯甲午卒不書其子申嗣是為文公張氏曰徒示威武暴及其民而蔡終不心服謂之能輔霸主服諸侯可乎

秋

齊人侵我西鄙

高氏曰齊商人篡弑其君又執我

澄按魯無得罪于齊齊之興師無名故曰侵

季孫行父如晉

高氏曰一歲再如晉者皆為齊故

冬

十有一月

諸侯盟于扈

左傳曰晉侯宋公衛侯蔡侯鄭伯許男曹伯盟于扈尋新城之盟且謀伐

齊也齊人賂晉侯故不克而還於是齊難是以公會澄按此非前目後凡之例而七國之君不列叙畧之也晉侯霸主也而與諸國同稱諸侯不以霸主畧晉靈也蔡侯新遭伐入之威故暫貳于楚而與中國之盟

十有二月

齊人來歸子叔姬

趙氏曰書來歸于姬上者非嫁後之出故異其文焉澄曰若左

氏所載事迹果是則經合書齊子叔姬來歸今不
繫齊則為未嫁之女明矣高氏曰晉會諸侯盟於
扈受齊賂而不伐齊故齊人
自歸子叔姬以解諸侯之意

齊侯侵我西鄙遂伐曹入其郭

左傳曰齊侵我謂諸侯不能也伐曹

入其郭討其來朝也季文子曰齊侯其不免乎已
則無禮而討于有禮者曰女何故行禮禮以順天
天之道也已則反天而又以討人難以免矣襄陵
許氏曰魯盡禮于晉而見侵弗恤曹脩禮于魯而
被伐莫救夫豈特齊之暴戾無道皆晉靈趙盾之
責也高氏曰齊商人弑君自立諸侯會于扈謀伐
之晉人取賂而還商人知諸國之無能為益無顧
忌肆其威暴且恚魯仗晉以謀已故一歲而再侵
我惡魯而及曹非禮甚矣因我而加兵于曹
曰侵可也而曰伐者討其朝魯執辭正也

經書月四書日一大衍歷正月癸酉小丁酉冬至
二月壬寅大三月壬申大四月壬寅小五月辛未
大六月辛丑小朔日食戊申八日己巳小滿閏月
庚午大七月庚子小旦日夏至八月己巳大九月
己亥小十月戊辰大十一月戊戌小十二月丁卯大

十有六年

庚戌匡王二年。晉霸靈十。蔡文公申
元年。曹文七。衛成二十四。鄭穆十

七。陳靈三。杞桓二十六。宋昭
九。弒。齊懿二。秦康十。楚莊三

春

季孫行父會齊侯于陽穀齊侯弗及盟

左傳曰及
齊平公有

疾使季文子會齊侯于陽穀請盟齊侯不肯曰請
侯君間澄曰及猶與也謂齊侯不與行父盟也高

氏曰晉侯既幼不在諸侯齊侯恃強數見侵伐故魯不得已而事之以行父當齊侯宜齊侯之弗肯與盟也張氏曰文公即位之元年以會霸主為憚而付之公孫敖以取晉怒魯之不得志于晉者數十年今齊之亂公能脩明政刑告天子方伯以討其罪則雖大國必畏之矣既不能然反使商人得以強大而威我親戚命使執辱于齊不唯邊鄙被患而與國與受其禍此有志者因心衡慮而圖之之時也而文公方且宴安于其國復使其臣犯分求盟以平累年之隙抑何不思之甚哉

夏

五月

公四不視朔

穀梁傳曰四不視朔厭政已甚矣公羊傳曰四不視朔有疾也自是公無

疾不視朔蘇氏曰定哀之間子貢欲去告朔之餼蓋不復視朔矣此公羊之所以為此言也然而五月書不視朔則六月視朔矣視朔之廢非始于此也杜氏曰諸侯每月必聽政因朝于廟今公不視二月三月四月五月之朔也趙氏曰公若誠有疾則不當譏據諸侯盟會文公三年不及又不曾齊以此推之知公怠於國務非疾也高氏曰朔者天子之所頒也諸侯上稟天子之命下授萬民之時故其奉正朔告于廟則謂之告朔退而視朝以授民則謂之視朔前此未有書不視朔者若其有疾則亦常事不書爾此特書者見公之非有疾而然也澄曰公不視朔非真有疾託疾以誑齊也今春季孫行父盟齊侯而齊不與盟必欲公自至公倦於往而畏齊之威故託疾以誑因不視朔乃遣公賂子遂往盟齊侯而齊侯與之盟蓋既託疾而又納賂故也按前書閏月不告朔猶朝于廟者其月雖

不告朔然猶朝于廟朝廟之後退而視朝是視朔之禮不廢也今四不視朔則不告朔不朝廟從可知也在後每朔之禮未嘗廢唯因朝事會盟行師而出不在國則廢至則又復舉矣其後蓋因季氏逐昭公魯國無君者七年故廢告朔之禮昭公薨於外定公以元年六月方即位自是告朔之禮不復舉故子貢欲去其羊謂不告朔自文公始者非也

六月

戊辰公子遂及齊侯盟于鄆丘

○鄆公作犀穀作師左傳曰公使公

子遂納賂於齊侯故盟于鄆丘杜氏曰鄆丘齊地高氏曰陽穀之會齊侯弗及盟者非特行父奉使之失也晉為魯故會諸侯于扈將以伐齊齊侯賂之遂不果伐於是齊侯欲取償于魯焉至是公使

公予遂納賂于齊而復求盟所以尋盟于鄆丘則有辭矣謂公四不視朔實有疾故也然則春秋書公四不視朔非特譏公之急亦以見公子遂得盟之由則知此盟非齊侯之欲故明年齊侯復伐我西鄙僅少紓而已

秋

八月

辛未夫人姜氏薨

傳公夫人文公母也

毀泉臺

公羊傳曰郎臺也未成為郎臺既成為泉臺毀何以書譏爾先祖為之已毀之不如

勿居而已矣何氏曰莊公所築不當暴揚先祖之惡也孫氏曰惡勞民也築之勞毀之勞既築之又

毀之可
謂勞矣

楚人秦人巴人滅庸

左傳曰楚大饑庸人率羣蠻以叛楚麋人率百濮聚于選

於是申息之北門不啓楚人謀徙於阪高爲賈曰
我能往寇亦能往不如伐庸夫麋與百濮謂我饑
不能師故伐我也我若出師必懼而歸百濮離居
將各走其邑誰暇謀人乃出師旬有五日百濮乃
罷使廬戢黎侵庸庸人逐之囚子揚窓三宿而逸
曰庸師衆羣蠻聚焉不如復大師且起王卒合而
後進師叔曰不可姑又與之遇以驕之七遇皆北
庸人曰楚不足與戰矣遂不設備楚子乘駟會師
分爲二隊以伐庸秦人巴人從楚師羣蠻從楚子
盟遂滅庸高氏曰楚率秦巴以滅人之國則秦又
聽服于楚矣夫城濮之役秦人在焉自是遂與中
國盟會而晉襄因般之役報復不已自是失秦矣

夫秦兵之彊後世莫及焉使其協和以攘楚且討其弑君父之罪蓋有餘力而晉反棄秦以資楚此中國之所不振也

冬

十有一月

宋人弑其君杵臼

杵公作處。左傳曰宋公子鮑禮于國人宋饑竭其粟而貸之

年自七十以上無不饋詒也無日不數于六卿之門國之材人無不事也親自桓以下無不恤也襄夫人助之施昭公將田孟諸未至夫人王姬使帥甸攻而殺之蕩意諸死之澄按宋昭公立九年不能其大夫國人襄夫人亦惡之出田孟諸甸徒攻而弑之故稱人以弑弑者賤人無名可書也蓋鮑

見昭公之失衆心固有圖為君之意而未有篡謀也襄夫人雖有以鮑易杵臼之意而未萌殺心也昭公出田旬徒弑之而鮑與夫人因得遂其素志左傳之文宜刪夫人王姬使帥六字方與經協蓋謂句衆知襄夫人之意而敢于行弑則可謂襄夫人使人帥旬弑之則未必然也孫氏曰稱人微者也名氏不登于史策胡氏曰蕩意諸死之而不得與孔父仇牧並書者君昏不能正危不能救坐待其死而與之同死所謂匹夫匹婦自經於溝瀆而莫之知也

經書月四書日二大衍歷正月丁酉小壬寅冬至二月丙寅大三月丙申小四月乙丑大五月乙未小六月甲子大戊辰五日七月甲午小八月癸亥大辛未九日九月癸巳小十月壬戌大十一月壬辰小傳甲寅二十三日十二月辛酉大長歷是年閏五月

十有七年

○辛亥匡王三年○晉霸靈十一○蔡文二○曹文八○衛成二十五○鄭穆十八○

陳靈四○杞桓二十七○宋文公鮑元年○齊懿三○秦康十一○楚莊四

春

晉人衛人陳人鄭人伐宋

左傳曰晉荀林父衛孔達陳公孫寧鄭石楚伐

宋討曰何故弑君猶立文公而還澄曰傳所載皆四國之卿而經書人者蓋元帥不行而遣裨將往伐也責其弑君是也但不當不誅弑君之人

夏

四月

癸亥葬我小君聲姜

聲公作聖。左傳曰：有齊難是以緩高氏。曰：九月乃葬，慢

齊侯伐我西鄙

左傳曰：齊伐我襄仲，請盟。高氏曰：齊猶以公不親盟，復來討焉。于此

見鄆丘之盟無益矣

六月

癸未公及齊侯盟于穀

齊伐我而晉不能救，公竟不免。親與齊侯盟。

諸侯會于扈

左傳曰：晉侯蒐于黃父，遂復合諸侯于扈。平宋也。公不與會，齊難故也。澄

曰：晉侯不能為盟主，而合諸侯，故畧之而不列序也。

秋

公至自穀危之

也

卷六

冬

公子遂如齊

左傳曰拜穀之盟杜氏謂曰公及齊侯盟而冬又聘之故左氏謂之拜盟

也

經書月二書日二大衍歷正月辛卯大丁未冬至
二月辛酉小三月庚寅大四月庚申小癸亥四日
五月己丑大六月己未小癸未二十五日七月戊
子大八月戊午小九月丁亥大十月丁巳大十一
月丁亥小十二月丙辰大長歷癸
亥四月五日癸未六月二十六日

十有八年

壬子匡王四年。晉霸靈十二。蔡文三。
曹文九。衛成二十六。鄭穆十九。

陳靈五。杞桓二十八。宋文二。
齊懿四。秦康十二卒。楚莊五。

春

王二月

丁丑公薨于臺下

高郵孫氏曰薨非路寢皆不正也臺下蓋又甚焉

秦伯瑩卒

秦康公也在位十二年子稻嗣是為共公高氏曰秦雖伯益之後本附庸也僻

在西夷自秦仲始大至平王時秦襄始有功於周室列於諸侯賜爵為伯穆公班於城濮之戰自後與中國交聘盟會遂霸西戎九年康公來歸僖公成風之襚始與魯通好至是遂書其卒

夏

五月

戊戌齊人弑其君商人

左傳曰齊懿公之為公子也與邴邴之父爭田弗勝

及即位乃掘而刑之而使歌僕納閭職之妻而使職驂乘公遊于中池二人弑懿公納諸竹中歸舍爵而行齊人立公子元澄曰歌職皆賤者故稱人而不書名何氏曰商人弑君賊齊人以君事之張氏曰商人固當討之賊然齊人不以為賊比而稱臣而君之者三年以為賊則不當事以為君則不可弑今三年事之一旦弑之亂作於大分已定之後故曰弑其君也

六月

癸酉葬我君文公

秋

公子遂叔孫得臣如齊

穀梁傳曰使舉上客而不稱介不正其同倫而相介

故列而數之也左傳曰襄仲莊叔如齊惠公立故且拜葬也澄按公子遂將殺適立庶而先聘齊以請故託賀立君及拜葬二事以行也二卿同使者一卿賀齊立君一卿拜葬也

冬

十月

子卒

左傳曰文公二妃敬嬴生宣公敬嬴嬖而私事襄仲宣公長而屬之襄仲襄仲欲立之叔

仲不可仲見于齊侯而請之齊侯新立而欲親魯許之仲殺惡及視而立宣公公羊傳曰子謂子赤

也不曰弑也弑何以不曰不忍言也穀梁傳曰子卒不日故也何氏曰與子般異般書曰孫氏曰成君弑不地子赤未逾年故不日以別之

夫人姜氏歸于齊

左傳曰大歸也將行哭而過市曰天乎仲為不道殺嫡立庶市

人皆哭魯人謂之哀姜

季孫行父如齊

告宣公之立也沙隨程氏曰遂得臣行父三人皆與謀以其前後如

齊而知之也高氏曰前乎子卒書如齊後乎子卒書如齊行父遂與公子遂同弑惡而立宣公故夫
人姜氏歸于齊而行父遽如齊焉惡實齊之甥恐齊人聽夫人之訴而來討於是議納賂以請平焉魯國臣子之罪不可勝誅也

莒弑其君庶其

公羊傳曰稱國以弑者衆弑其君之辭也左傳曰莒紀公生太子僕

又生季佗愛季佗而黜僕且多行無禮于國僕因國人以弑紀公以其寶玉來奔澄曰如左氏之言則是太子僕以子弑父也春秋何得不書而乃書國弑乎且僕既與國人同弑君則又何以奔魯乎或疑僕因國人之下以字當作之謂僕因國人之弑紀公懼并及禍故以其寶玉來奔也

經書月四書日三大衍歷正月丙戌小癸丑冬至二月乙卯大癸未大寒丁丑二十三日閏月乙酉小三月甲寅大旦日雨水四月甲申小經五月戊戌在此月五月癸丑大經六月癸酉在此月六月癸未小七月壬子大八月壬午小九月辛亥大十月辛巳小十一月庚戌大十二月庚辰小長歷丁丑二月二十四日戊戌五月十一日癸酉六月二十二日

春秋纂言卷六

欽定四庫全書

春秋纂言卷七

元 吳澄 撰

宣公

名倭一名接文公妾敬嬴之子在位十八年夫人穆姜

元年

癸丑匡王五年。晉霸靈十三年。蔡文四年。曹文十年。衛成二十七年。鄭穆二十年。

○陳靈六年。杞桓二十九年。宋文三年。齊惠公元年。秦共公稻元年。楚莊六年。

春

王正月

公即位

凡繼弑君不即位者以君父遭弑而賊未討則太子不忍行即位禮或國亂人心危

疑不暇行即位禮也仲遂以臣弑君宣公以庶奪嫡方以子惡被弑而已得立為得志故安然行即位禮

公子遂如齊逆女

胡氏曰宣公懼於見討故結昏于齊為自安計越典禮而逆女

如此其亟而不顧者必敬贏公子遂立接之始謀也高氏曰不待喪畢而公子遂遽如齊逆女者恐姻好久不通而齊人來討也且娶于齊則公因得以列于會而諸侯不復討矣澄按負篡弑之罪而急于結齊昏以定其位此惡之大喪娶卿逆之非禮則其惡之小者爾

三月

遂以夫人婦姜至自齊

高氏曰不直書夫人婦姜至自齊而稱遂以者明公

子遂不當以夫人歸也婚禮莫重乎親迎豈容他人得以之歸哉公子遂蓋公族之尊者尤不可也不稱公子一事再見也文公逆婦姜于齊不稱夫人自逆故也此稱夫人者臣下之辭也婦者有姑之辭無姑則專以夫人之禮至有姑則以婦禮至姑者敬嬴以嬖妾私事襄仲以屬其子弑世嫡兄弟黜主君夫人乃援成風故事即以子貴為國母今斬焉在衰經之中而請昏納婦故因夫人至特稱婦姜以顯敬嬴妾也而姑之李堯俞曰經稱婦姜者不言氏婦人言氏以配姓蓋欲稱謂之順也春秋於內女則稱叔姬於外女則不可以叔伯言之故夫人不言謚不稱婦則必以氏配之今此婦而言姜加氏則稱謂之繁也亦猶文姜成風以謚稱而不以氏稱也如成十四年書婦姜氏者趙氏增也

夏

季孫行父如齊

左傳曰如齊納賂以請會高氏曰公既昏矣然後季文子如齊納賂

請列于會蓋春秋時凡國君不以其道立苟得一預於諸侯之會則他國不得復討其罪所以季文子不憚自行者欲假大國之權以定宣公之位也宣公之位定則一時臣子黨亂誤國之罪庶皆可

以逃矣昔人稱季文子三思而後行今當魯國喪禍之際而舉動乖錯如此安在其為三思哉是必思之過多而方寸亂矣故孔子譏之呂氏曰君母不正孽子篡立而國之大臣恃大國以免施施肆肆無所忌憚行父名大夫也而猶若是先王之澤盡矣張氏曰文公世子之死在官當誅者公子遂

其首行父次之

晉放其大夫胥甲父于衛

左傳曰晉人討不用命者杜氏曰胥甲晉下軍

胥臣之子文公十二年戰河曲不肯薄秦於險蘇氏曰胥甲趙穿其罪一也放胥甲而捨趙穿穿盾之族子也胡氏曰秦晉戰河曲撓曳駢之謀者趙穿也若討其不用命當以穿為首而獨放胥甲父則以趙盾當國而庇其族子也澄按河曲之戰及今八年矣豈有不用命之罪八年而後討哉必胥甲父以他事取惡於趙盾而盾逐之也

公會齊侯于平州

左傳曰會于平州以定公位杜氏曰平州齊地在泰山牟縣西

張氏曰後漢志瑯琊國陽都故地有牟臺註云平州在縣西凡亂臣賊子之所以不敢縱其欲者以有霸主大國能討之也齊乃魯之鄰其力足以正魯而惠公不明于義利邪正之辨始許仲遂以亂

魯之適庶終會平州以定賊子之位則亂賊復何畏而不逞哉晉為盟主而齊宋弑君威弗能加魯亂不治見晉之無能為也

公子遂如齊

左傳曰如齊拜成胡氏曰遂一再見于經矣拜成又書者著其始終成就

弑立之謀

六月

齊人取濟西田

左傳曰為立公故以賂齊也杜氏曰濟西故曹地僖三十一年晉文

以分魯呂氏大圭曰春秋書取田邑有伐而書取者八如隱四年莒人伐杞取牟婁十年公敗宋師取郕取防僖二十二年公伐邾取須句二十六年公以楚師伐齊取穀三十三年公伐邾取訾婁宣

四年公伐莒取向九年齊侯伐萊取根牟十年公孫歸父伐邾取繹是用兵力以取之也有直書取者如僖三十一年春取濟西田我取之曹也此年齊人取濟西田齊取之我也成二年取汶陽田以鞏之戰而齊以歸我也此則不用兵力而取之也張氏曰桓公篡立求援于鄭而誘以許田宣公奪嫡主齊以自立而賂以濟西以利自固前後一轍使鄭莊齊惡不貪其利則桓宣必不能以自立矣

秋

邾子來朝

文十四年來朝我南鄙今六年來朝不詳其故

楚子鄭人侵陳遂侵宋

左傳曰宋人之弑昭公也晉荀林父以諸侯之師伐

宋宋及晉平宋文公受盟于晉又會諸侯于扈將為魯討齊皆取賂而還鄭穆公曰晉不足與也遂

受盟于楚陳共公卒楚人不禮焉陳靈公受盟于
晉故楚子侵陳宋胡氏曰鄭以宋人弑君晉不能
討以此罪晉為不足與今乃附楚以亟病中國何
義乎書侵陳遂侵宋者以見此師為不義掠境侵
暴非能聲宋之罪也呂氏大圭曰春秋盟會而書
楚子自孟始征伐而書楚子自侵陳始向也次厥
貉嘗書楚子矣然未嘗加兵於中國也伐麋亦書
楚子矣然不過加兵于其與國也征伐而書爵者
皆伯之之辭侵蔡伐楚書齊侯霸齊侯也侵曹伐
衛書晉侯霸晉侯也侵陳侵宋書楚子春秋固霸
楚子乎書齊侯晉侯喜中國之猶有霸也書
楚子傷中國之無霸而荆蠻得以執霸權也

晉趙盾帥師救陳

高氏曰鄭連楚以侵陳與宋晉何為獨救陳曰以楚兵主在于

陳因加于宋晉人踰宋而救陳救陳而師退是救
宋也故舉救陳則及宋舉救宋則不及陳矣胡氏

曰傳稱師救陳宋經不書宋聖人削之也前方以不能討宋諸侯會而不序今若書救宋則典刑紊矣

宋公陳侯衛侯曹伯會晉師于棐林伐鄭

棐公作斐○左

傳曰楚薦賈救鄭遇于北林因晉解揚晉人乃還杜氏曰棐林鄭地滎陽宛陵縣東南有林鄉澄曰晉師即趙盾救鄭之師也以四國之君在會故不稱趙盾而稱晉師也陳先代之後而受侵逼霸主所宜救也鄭以畿內之國而附蠻夷霸主所當伐也惜乎晉霸不競荆蠻方彊晉卿能致四國之君聲罪致討不能服鄭而反遺楚禽中國之不振可傷也

冬

晉趙穿帥師侵崇

崇公作柳。左傳曰晉欲求成於秦趙穿曰我侵崇秦急崇必

殺之吾以求成焉趙穿侵崇秦弗與成杜氏曰崇秦之與國任公輔曰按地譜商有崇國在京兆鄠縣甘亭高氏曰晉方病楚而欲得秦欲求成而反加兵於他人之國適足以衆晉之敵耳此謬計也

晉人宋人伐鄭

左傳曰以報北林之役于是晉侯侈趙宣子為政驟諫而不入故不

競于楚澄按蔡林之會晉合四國以伐鄭而無功故至于再伐不復可致三國伐鄭者為宋也故獨與宋連兵高氏曰宋怨鄭與楚之役也復請晉伐鄭晉亦以前殺之無功也遂連兵伐之夫晉以貪賂致諸侯之叛不能退而自責乃謀動干戈於外以遂宋之復怨况宋人弑君豈可與之合兵乎

經書月三書日無大衍歷正月己酉大戊午冬至二月己卯大三月己酉小四月戊寅大五月戊申

小六月丁丑大七月丁未小八月丙子大九月丙午小十月乙亥大十一月乙巳小十二月甲戌大二年甲寅匡王六年崩。晉霸靈十四弑。蔡文五。曹文十一。衛成二十八。鄭穆三十一。陳靈七。杞桓三十。宋文四。齊惠二。秦共二。楚莊七。

春

王二月

壬子宋華元帥師及鄭公子歸生帥師戰于大棘

宋師敗績獲宋華元

左傳曰鄭公子歸生受命于楚伐宋華元樂呂御之戰于

大棘宋師敗績囚華元獲樂呂及甲車四百六十乘俘二百五十人馘百人宋人以兵車百乘文馬

百駟以贖華元于鄭。半入華元，逃歸杜氏。曰：大棘在陳留襄邑縣南。張氏曰：襄邑今屬拱州。澄曰：鄭附楚，侵中國之陳。宋晉為宋故，再伐鄭而皆無功。鄭受楚命，一戰宋而乃大勝楚人之氣，益張矣。李氏堯俞曰：春秋三十四戰，主客並書。帥師者惟此及哀二年趙鞅罕達而已。高氏曰：元年秋，鄭人與楚子侵宋。宋人既為棠林之役，以報之。是冬又與晉人伐鄭，一役而兩報之，遂起此役。今鄭師之來，宋當明大義以諭之。否則慎固封守，使鄭不得而犯焉。華元乃遽帥師出與之戰。於是三軍大敗，以至見獲，不能效死，徒殄民辱國而已。以見中國因夷狄之故而自相殘，如此呂氏大圭曰：春秋書戰言大夫帥師，自此始。自是而後，若晉荀林父、衛孫良夫、魯季孫行父、莊孫許叔孫僑如、公孫嬰齊，國書皆大夫帥師而戰。惟晉趙鞅、鄭罕達戰于鐵及此年戰大棘而稱帥師者，其衆敵也。春秋書獲者

七惟齊國書及此年宋華元書敗績者身見獲而師又敗也大夫生死皆言獲鄭獲宋華元生也吳獲陳夏齧吳獲齊國書死也蓋存之殺之皆在既獲之後爾

秦師伐晉

左傳曰以報崇也遂圍焦晉趙盾救焦胡氏曰晉用大師于崇乃趙穿私意而

無名也故書侵秦人為是與師而報晉則問其無名之罪也故書伐

夏

晉人宋人衛人陳人侵鄭

左傳曰晉趙盾遂自陰地及諸侯之師侵鄭以

報大棘之役楚闔叔救鄭曰能欲諸侯而惡其難乎遂次于鄭以待晉師盾曰彼宗競于楚殆將斃矣姑益其疾乃去之澄曰晉于興諸侯之師為宋報鄭師出無名又畏楚之救而還師高氏曰自是

楚與晉爭晉不能競反有弑逆之禍
於是楚並自肆明年遂有問鼎之事

秋

九月

乙丑晉趙盾弑其君夷臯

臯公作俸。左傳曰晉侯飲趙盾酒伏甲將攻

之其右提彌明知之趙登曰臣侍君宴過三爵非禮也遂扶以下公喉夫樊焉明搏而殺之盾曰棄人用犬雖猛何為闔且出提彌明死之靈輒與為公介倒戟以禦公徒而免之遂自亡也趙穿攻靈公于桃園宣子未出山而復澄曰趙盾專晉國之政幾二十年境內境外知有盾而不知有靈公公既長不堪其專遂欲殺盾提彌明扶盾出走明既搏殺公樊又與公徒鬪而死則盾之私屬與公徒

敵無復有臣禮矣靈輒內叛倒戟以禦內兵故盾得幸免然君臣既為仇敵非盾弑公則公殺盾勢固不兩立也穿盾之族子平日所愛信之人也弑公而盾乃復穿之弑為盾弑也盾為首惡穿特承意行事者爾此正與魏帝髦之弑同髦惡司馬昭之專率徒以攻昭昭倉皇奔避賈充謂成濟曰司馬公養汝等政在今日於是成濟操刀而皇極經得免於誅夫弑髦賈充發言成濟操刀而皇極經世書及通鑑綱目皆書曰魏司馬昭弑其君髦曷嘗歸咎於賈充與成濟哉趙盾之專猶司馬昭之專也晉靈之欲殺盾猶曹髦之欲殺昭也趙穿之弑晉靈猶成濟之弑曹髦也趙盾陽為不知謀以求自免其弑君之罪將誰欺乎夫子書曰晉趙盾弑其君夷臯誅首惡也故曰春秋成而亂臣賊子懼亂臣謂趙盾也賊子謂許世子止也彼二人者弑君弑父而欲欺人以為非己所弑其懼者何以

聖人不可欺而直筆不之赦也自三傳以來說春秋者多方為盾止分釋則是亂臣賊子不可以欺聖人而乃可以欺後儒也靈公在位十四年趙盾使趙穿逆襄公之弟黑臀于周而立之是為成公

冬

十月

乙亥天王崩

匡王也在位六年其弟瑜立是為定王

經書月三書日三大衍歷正月甲辰小癸亥冬至經二月壬子在此月二月癸酉大三月癸卯小四月壬申大五月壬寅大六月壬申小七月辛丑大八月辛未小九月庚子大乙丑二十六日十月庚午小乙亥六日十一月己亥大戊辰處暑閏月己巳小十二月戊戌大長歷是年閏五月壬子二月

二日乙丑九月二十
七日乙亥十月八日

三年

乙卯定王元年。晉霸成公黑臀元年。蔡文
六。曹文十二。衛成二十九。鄭穆二十二

卒。陳靈八。杞桓三十一。宋文
五。齊惠三。秦共三。楚莊八

春

王正月

郊牛之口傷改卜牛牛死乃不郊猶三望

公羊傳曰郊則

必祭稷養牲養二卜帝牲不吉則扳稷牲而卜之
帝牲在于祿三月于稷者唯具是視左傳曰望郊
之屬也不郊亦無望可也杜氏曰牛不稱牲未卜
日也齊氏旨要曰牛卜日曰牲今未卜日尚為祭

牛范氏曰牛無故其口自傷易牛改卜復死乃廢郊禮高氏曰魯僭郊禮久矣隱桓莊閔不書者聖人不敢無故斥言君父之過故因變異而書也胡氏曰乃不郊者為牛之口傷改卜而牛又死也不然郊矣禮為天王服斬衰周人告喪於魯史策已書而未葬也祀帝于郊夫豈其時而或謂不以王事廢天事禮乎張氏曰此又因事之變以明魯郊之非禮也而僭禮之中復有忘哀從吉之罪三年之喪乃臣子斬衰奔赴之時豈可僭天子越紼行事之禮此春秋所以特書之并書猶三望以譏其可已而不已也

葬匡王

高氏曰前期而葬者簡也王室微諸侯不至也

楚子伐陸渾之戎

陸渾之戎公作奔賁戎。左傳曰楚子伐陸渾之戎遂至于雒

觀兵於周疆定王使王孫滿勞楚子楚子問鼎之大小輕重對曰在德不在鼎周德雖衰天命未改鼎之輕重未可問也

夏

楚人侵鄭

左傳曰晉侯伐鄭及邲鄭及晉平士會入盟楚人侵鄭鄭即晉故也胡氏曰鄭

以晉靈不君取賂釋賊為不足與是也而往從楚非矣今晉成初立背僭竊而歸諸夏是反正也春秋大改過許遷善不書晉伐鄭鄭及晉平者與鄭伯之能反正也故獨書楚人侵掠諸夏之罪

秋

赤狄侵齊

赤狄始見經張氏曰赤狄狄之別國孔疏云謂之赤狄白狄者俗尚赤衣白衣

也地諸洛州春秋赤狄之地高氏曰見狄之族類已分矣襄陵許氏曰楚侵其南狄侵其北天下棟撓之時也

宋師圍曹

左傳曰宋文公即位三年殺母弟須及昭公子武氏之謀也使戴桓之族攻武

氏于司馬子伯之館盡逐武穆之族武穆之族以曹師伐宋宋師圍曹報武氏之亂也高氏曰武氏之亂非曹所致也宋不能內睦九族而興兵以圍人之國不亦左乎

冬

十月

丙戌鄭伯蘭卒

鄭穆公也在位二十二
年子夷嗣是為靈公

葬鄭穆公

葬連禮不備也

經書月二書日一大衍歷正月戊辰小旦日冬至
二月丁酉大三月丁卯大四月丙申大五月丙寅
小六月乙未大七月乙丑小八月甲午大九月甲
子小經十月丙戌在此月十月癸巳大十一月癸
亥小十二月壬辰大長
歷丙戌十月二十五日

四年

丙辰定王二年。晉霸成二。蔡文七。曹文
十三。衛成三十。鄭靈公夷元年弑。陳靈

九。紀桓三十二。宋文六。
齊惠四。秦共四卒。楚莊九。

春

王正月

公及齊侯平莒及邾莒人不肯

杜氏曰莒邾二國相怨故公與齊侯

共平之高氏曰莒邾相怨而邾乃魯昏姻之國公欲為邾平莒而挾齊以為重故及齊侯公之義不足以為服莒之心莒所以不肯也肯者心以為然而從之也曰莒人見其不肯者非特其君也

公伐莒取向

向舒亮切○左傳曰平國以禮不以亂伐而不治亂也以亂平亂何治之

有杜氏曰向莒邑東海承縣東南有向城張氏曰宣公平二小國若出於公不必假齊一言而彼已服今挾齊為重而莒尚不肯伐莒而齊不復與復取向以自益著宣公之公而終之以利也高氏二曰大國以好平兩小國之怨而且不能不知自反而取邑於人亦已甚矣公既無以得莒後書邾伯姬來歸則邾亦不能固其好也然向本魯地桓十六年城向是也後入于莒豈魯與莒有好事而向還

莒燬至此莒弗肯平
然後公復取向也

秦伯稻卒
秦共公也在位
五年子桓公嗣

夏

六月

乙酉鄭公子歸生弑其君夷
夷靈公也嗣位一年
鄭人立穆公之庶子

堅是為襄公據諸家之說皆謂公子宋弑君歸生
不能誅宋而反從其邪謀故為首惡然宋實手弑
其君之賊何乃得免于罪乎左傳所載事蹟猥陋
蓋不足信而諸家為傳所惑故生曲說以從傳也
歸生貴戚之卿秉國重權嗣君新立必有所不獲
於其君者因宋之有邪謀陽為畜老憚殺之言陰

實假手于宋以除其君此
亂臣之首而宋特其從也

赤狄侵齊

高氏曰以齊之彊而連年為狄所侵則惠公之無政可知矣

秋

公如齊

高氏曰狄在齊境而公往朝之宣公之無政也又可知矣

公至自齊

胡氏曰宣公比年如齊而皆至者危之也張氏曰危之者與桓二年公至自唐

意同

冬

楚子伐鄭

左傳曰鄭未服也杜氏曰前年楚侵鄭不獲成故曰未服高氏曰中國諸侯不

問鄭國弑君之罪而夷狄興
兵以討之所以病中國也

經書月二書日一大衍歷正月壬戌大甲戌冬至
二月壬辰小三月辛酉大四月辛卯小五月庚申
大經六月乙酉在此月六月庚寅小傳七月戊戌
在此月七月己未大八月己丑小九月戊午大十
月戊子小十一月丁巳大十二月
丁亥小長歷乙酉六月二十七日

五年

丁巳定王三年。晉霸成三。蔡文八。曹文
十四。衛成三十一。鄭襄公堅元年。陳靈

十。杞桓三十三。宋文七。齊
惠五。秦桓公榮元年。楚莊十

春

公如齊

高氏曰公以不義得國故亟朝於齊且公
始即位公子遂季孫行父一歲而三聘齊

至是甫及三時而再朝
謹事大國以自固也

夏

公至自齊

左傳曰齊高固使齊侯止公請叔姬焉高氏曰春如齊而夏至者以齊人止公

彊為高固請昏也故書至以危之

秋

九月

齊高固來逆子叔姬

左逆下無子字。左傳曰卿自逆也高氏曰古者三十而

娶五十而爵為大夫故大夫無出竟親迎者高固為齊正卿而始與魯昏越竟逆女非禮矣胡氏曰

嫁女於大夫而不使大夫主之公自為主厭尊毀列卑朝廷慢宗廟矣鄭國禍小楚公子圍之貴驕彊大來娶于鄭子產辭而却之使館于外宣公以國君而逼于高固彊委禽焉而不能止春秋詳書此辱為後世鑒澄曰宣公負篡國之罪倚齊以安數朝數聘卑身事齊猶以為未甚至齊之臣彊取其女甘心與之而不敢違蓋身為不義故忍恥忍辱而屈於人下如此曹子臧吳季札彊與之國義不肯受不降其志而常伸於人上者果何人哉

叔孫得臣卒

不書日
文闕

冬

齊高固及子叔姬來

左傳曰反馬也胡氏曰禮嫁女留其送馬不敢自安及廟

見成婦遣使反馬高固親來非禮也況是逆未易
歲遽歸寧乎高氏曰歸寧常事不書反馬亦常事
不書高固為齊卿非王事不當出境既未娶而為
國卿又不可以國卿而有新昏反馬之禮也啖子
曰大夫非公事與妻出境非
禮也時叔姬初嫁未合歸寧

楚人伐鄭

楚數犯中國也

經書月一書日無大衍歷正月丙辰大己卯冬至
二月丙戌大三月丙辰小四月乙酉大五月乙卯
小六月甲申大七月甲寅小壬午夏至八月癸未
大壬子大暑閏月癸丑小九月壬午大旦日處暑
十月壬子小十一月辛巳大十二月辛亥小

六年

戊午定王四年。晉霸成四。蔡文九。曹文
十五。衛成三十二。鄭襄二。陳靈十一。

杞桓三十四。宋文八。齊惠六。秦桓二。楚莊十一。

春

晉趙盾衛孫免侵陳

左傳曰陳及楚平晉荀林父帥師救鄭伐陳陳即楚故也

高氏曰趙盾前會衛侯救陳今更與衛孫免加兵于其國故書侵以正主盟者之罪雖以陳背晉即楚亦以晉救之無功故也

夏

四月

秋

八月

螽 高氏曰書八月者惟八月有之非歷時也螽為農災王道所重今以月書則為災不久輕於以

時書者矣

冬

十月

經書月三書日無大衍歷正月庚辰大甲寅冬至二月庚戌小三月己卯大四月己酉大五月己卯小六月戊申大七月戊寅小八月丁未大九月丁丑小十月丙午大十一月丙子小十二月乙巳大閏歷是年閏五月

七年

已未定王五年。晉霸成五。蔡文十。曹文十六。衛成三十三。鄭襄三。陳靈十二。

杞桓三十五。宋文九。齊惠七。秦桓三。楚莊十二。

春

衛侯使孫良夫來盟

左傳曰孫桓子來盟始通且謀會晉也胡氏曰是盟衛欲

為晉致魯而魯專事齊初未與晉通也必有疑焉而衛侯任其無咎故遣良夫來為此盟

夏

公會齊侯伐萊

杜氏曰萊國東萊黃縣張氏曰今登州黃縣有萊山胡氏曰平莒及

鄭魯欲也故書及伐萊齊志也故書會齊合黨連兵恃彊陵弱而宣公惟命之從也高氏曰公方與

衛盟將復從晉而又應齊侯之命興兵以陵弱小之國此又取辱之道也

秋

公至自伐萊

高氏曰為齊興兵逾時而歸故以伐萊至

大旱

胡氏曰公與齊侯合黨連兵恃彊陵弱軍旅之後必有凶年言民以征役怨咨之氣感動

天變而旱乾作矣

冬

公會晉侯宋公衛侯鄭伯曹伯于黑壤

左傳曰鄭及晉平公

子宋之謀也故相鄭伯以會晉侯之立也公不朝焉又不使大夫來聘晉人止公于會盟于黃父啖

氏曰經但言會傳作盟不與經合又見公止亦近誣

經書月無書日無大衍歷正月乙亥小己丑冬至二月甲辰大三月甲戌小四月癸卯大五月癸酉小六月壬寅大七月壬申小八月辛丑大九月辛未大十月辛丑小十一月庚午大十二月庚子小
八年庚申定王六年○晉霸成六○蔡文十一○曹文十七○衛成三十四○鄭襄四○陳靈十三○杞桓三十六○宋文十○齊惠人○秦桓四○楚莊十三

春

公至自會

宣公篡立自疑而不敢會晉衛欲為晉致魯故去春使孫良夫來盟而後去冬

公與黑壤之盟縱使無左傳所記止公不得與盟之辱亦必懷疑而自危故此書至而自是不敢如

晉

夏

六月

公子遂如齊至黃乃復

公羊傳曰有疾也高氏曰不稱有疾者大夫受命而

出雖死以尸將命豈可以疾而廢君命耶張氏曰黃齊境上地書至黃乃復與公孫敖不至而復同

罪其違君命也

辛巳有事于太廟仲遂卒于垂

有事于太廟常事不書欲知仲遂以

祭之日而卒故書遂不書公子上文已有公子字史文從簡仲者遂之字也卒而以字加於名之上

者賜之族而以其字為氏使世為卿如季友之例也張氏曰垂齊地非魯境故書也

壬午猶繹萬入去籥

辛巳日祭壬午祭之明日胡氏曰繹者祭之明日賓尸也

猶者可已之辭禮大夫卒當祭則不告終事而聞則不繹不告者盡肅敬之誠於宗廟不繹者全始終之恩於臣子今仲遂國卿也卒而猶繹則失遇臣之禮矣呂氏曰萬舞文武二舞之總名籥舞文舞之別名文舞又謂之羽舞蓋文舞吹籥秉翟羽也萬入去籥者文武二舞俱入於二舞中去太舞吹籥以其有聲也去其有聲而用其舞者仲遂卒於正祭之日則次日已聞之行吉禮於方聞喪之時雖用舞而僅去其有聲者是知其不可而猶為之也

戊子夫人嬴氏薨

嬴公穀作熊○杜氏曰宣公母也高氏曰此文公之妾也何以

稱夫人薨援成風之例僭也胡氏曰自成風事季友而屬其子及僖公得國立為夫人嫡妾亂矣敬嬴又私事襄仲而屬宣公援例以立

晉師白狄伐秦

左傳曰白狄及晉平會晉伐秦張氏曰白狄今丹州延州銀夏之地

白狄秦同壤之國也晉與秦自侵崇啟釁七年猶未已與白狄為昏結以伐秦自此至成十三年呂相絕秦之辭皆連兵之事高氏曰晉不能糾合諸侯以興霸業乃外連白狄以伐秦穀之役書晉人及姜戎此不言及者以傳考之白狄為主也經先晉者不與白狄之得主兵也伯國而乃以兵屬人恥也

楚人滅舒蓼

蓼穀作鄆。左傳曰楚為衆舒叛故伐舒蓼滅之楚子疆之及滑汭盟吳

越而還杜氏曰舒蓼二國名或曰僖三年經書徐人取舒文五年傳記楚公子變滅蓼彼蓋上義陽之蓼不與羣舒近其國已滅矣此舒蓼則如舒庸舒鳩蓋羣舒之別種非二國也

秋

七月

甲子日有食之既

冬

十月

己丑葬我小君敬嬴雨不克葬

敬嬴公穀作頃熊

庚寅日中而克葬

穀梁傳曰葬既有日不為雨止禮也雨不克葬喪不以制也胡

氏曰卜葬先遠日以避不慎也諸侯相朝與旅見天子大雨霑服失容則廢矧送終大事人情所不忍遽者反可冒雨不待成禮而葬乎潦車載簣笠士喪禮也有國家者乃不能為雨備何也襄陵許氏曰子惡之弑謀自敬嬴故春秋因其不克葬而著咎徵焉君子於是乎知有天道

城平陽

杜氏曰泰山平陽縣張氏曰今鄒縣南有平陽城高氏曰懼晉故也方舉大喪又城

平陽重困人力也

楚師伐陳

高氏曰陳以晉衛見侵復棄楚而從晉故楚以為討稱師稱伐所以譏其始謀

之失也然晉不能救陳陳遂復即楚

經書月三書日六大衍歷正月己巳大巳未冬至
二月己亥小二月戊辰大四月戊戌小五月丁卯
大丙申穀雨閏月丁酉小六月丙寅大丁卯小滿
辛巳十六日壬午十七日戊子二十三日七月丙
申小八月乙丑大九月乙未小十月甲子大巳丑
二十六日庚寅二十七日經書七月甲子日食程
氏公說曰杜預長歷自僖十二年至文元年五年
一閏者二四年一閏者三失二閏焉又自文十六
年至宣十年四年一閏者三又失一閏焉預歷七
月朔不入食限甲子晦亦不入食限大衍歷十月
甲子朔日食黃道命五度半十一月甲午小十二
月癸亥大長歷辛巳六月十七日巳丑十月二十
日五

九年

辛酉定王七年。晉霸成七年。蔡文十二。
曹文十八。衛成三十五。辛。鄭襄五。陳靈

十四。杞桓三十七。宋文十一。
齊惠九。秦桓五。楚莊十四。

春

王正月

公如齊

孫氏曰公有母喪而
遠朝彊齊無哀甚矣

公至自齊

胡氏曰經於如齊每
行必至深罪之也

夏

仲孫蔑如京師

左傳曰王使來徵聘高氏曰信斯
言也益見王室之微矣胡氏曰宣

公享國九年再朝齊矣於周僅一往聘歲首
月朝齊夏使大夫聘京師比事而惡自見

齊侯伐萊

襄陵許氏曰赤狄北侵齊不敢報萊不伐齊而齊亟伐之可以觀惠公畏彊陵

弱矣

秋

取根牟

杜氏曰根牟近魯國也邶邪陽都縣東有牟鄉劉氏曰附庸之國也高氏曰蓋萊邑

也七年公會齊侯伐萊此齊侯再伐公雖不與伐而乘危取之也昭八年傳云大蒐于紅自根牟至

于商衛

八月

滕子卒

昭公也子文公嗣高氏曰自隱七年書滕侯卒至此始書滕子

九月

晉侯宋公衛侯鄭伯曹伯會于扈

左傳曰討不睦也高氏曰復謀

齊也齊與諸侯不睦而魯獨事之故公不與會

晉荀林父帥師伐陳

陳不來會即楚故也去年楚伐陳晉不能救今乃伐之不

義甚矣

辛酉晉侯黑臀卒于扈

成公也在位七年其子孺嗣是為景公

冬

十月

癸酉衛侯鄭卒

成公也在位三十五年其子速嗣是為穆公胡氏曰晉成公不葬魯

不會也衛成公不葬亦魯不會也

宋人圍滕

左傳曰因其喪也胡氏曰滕小國又方有喪所宜矜哀弔恤而用兵圍之不仁

甚矣

楚子伐鄭

高氏曰楚子聞晉侯卒于扈以重兵來討鄭伯之貳於是鄭復與楚平

晉卻缺帥師救鄭

高氏曰鄭已與楚平矣救之無益也自是晉楚交伐鄭

陳殺其大夫洩冶

洩公穀作泄○左傳曰陳靈公與孔寧儀行父通於夏姬皆哀

其相服以戲于朝洩冶諫曰公卿宣淫民無效焉且聞不令君其納之公曰吾能改矣公告二子二

子請殺之公弗禁遂殺洩治胡氏曰稱國以殺者君與用事大臣同殺之也治以諫殺身者也殺諫臣者必有亡國弑君之禍此為微舒弑君楚子滅陳之端

經書月四書日二大衍歷正月癸巳大庚子冬至二月癸亥小三月壬辰大四月壬戌小五月辛卯大六月辛酉小七月庚寅大八月庚申小經九月辛酉在此月九月己丑大十月己未小癸酉十五日十一月戊子大十二月戊午小長歷九月辛酉亦在八月癸酉十月十六日

十年

壬戌定王八年○晉霸景公孺元年○蔡文十三○曹文十九○衛穆公速元年○鄭襄六○

陳靈十五弑○杞桓三十八○宋文十二○齊惠十卒○秦桓六○楚莊十五

春

公如齊

公至是四朝齊矣

公至自齊

齊人歸我濟西田

左傳曰齊侯以我服故歸濟西之田杜氏曰元年以賂齊也不

言來公如齊因受之澄按公在齊而齊以田歸之非遣使來致也故不書來歸胡氏曰宣公于齊順其所欲既以女妻其臣又會伐萊又每歲往朝於齊廷惠公悅其順事己而以所取濟西田歸之也高氏曰元年書齊人取濟西田蓋魯以濟西之田賂齊而齊人取之也至是而歸者公比年朝齊齊侯感公朝事之勤因其請而歸之也夫魯之分地先君受之于天子豈可失墜又况負篡逆之罪賂以免討乎齊人取弑逆之賂以縱惡故其取其歸皆謹書之然其它歸田未有言我而此獨曰我濟

西田者獨此本魯田也若哀八年歸謹及鄆闡定八年齊人歸鄆謹龜陰田皆魯侵諸侯而得之非周公之本封也既本它國之田故不言我鄆謹龜陰田特曰來歸者夾谷之會孔子相焉責以禮義齊人自服而來歸也它祇書歸者皆因請而得之爾

夏

四月

丙辰日有食之

己巳齊侯元卒

惠公也在位十年其子無野嗣是為頃公

齊崔氏出奔衛

左傳曰崔杼有寵於惠公高國畏其偪也公卒而逐之公羊傳曰稱

崔氏譏世卿也張氏曰特書其氏見崔杼之宗彊
於齊故勢足以偪高國今日雖逐之而尚能復歸
於齊如崔成之徒後日卒自遺滅宗之禍豈非族
大勢張而不知制節謹度卒至凶于家禍于國也
歟孫氏曰東遷之後天子諸侯之大夫皆世書尹
氏譏天子之大夫書崔氏譏諸侯之大夫高氏曰
隱三年書尹氏卒昭三十三年書尹氏立王子朝
又三年書尹氏以王子朝奔楚自隱至昭二百年
矣而尹氏世執國政故卒有子朝之難而專廢立
之權也此年書齊崔氏出奔衛至襄二十三年書
齊崔杼弑其君光自宣至襄五十餘年崔氏世為
齊大夫故卒有弑君之禍也春秋之時尊莫如周
彊莫如齊而世卿之禍如此尹氏崔氏聖人於
世卿之中擇其至彊而為害之深者以為戒也

公如齊

左傳曰如齊奔喪杜氏
曰公親奔喪非禮也

五月

公至自齊

胡氏曰春如齊朝夏復奔其喪若是雖不至可也而皆至者甚之也

癸巳陳夏徵舒弑其君平國

左傳曰陳靈公與孔寧儀行父飲酒於夏

氏公謂行父曰徵舒似汝對曰亦似君徵舒病之公出自其廄射而殺之二子奔楚澄曰靈公在位十五年子午嗣是為成公成公不討弑君父之賊則知靈公之惡播於國人而徵舒之罪國人所弗慙也胡氏曰禍莫大于拒諫而殺直臣忠莫顯於身見殺而其言驗洩治所謂不憚斧鉞盡言於其君者正謂靈公君臣通于夏徵舒之家恐其及禍不忍坐視故昧死言之靈公不能納又從而殺之卒以見弑而亡其國書以驗見弑之由也

六月

宋師伐滕

左傳曰滕人恃晉而不事宋宋師伐滕胡氏曰稱師用衆也鄭有弑逆不能聲

罪致討乃用大衆以伐所當矜恤之小邦且滕不事已無乃已德猶有所闕而滕何尤焉

公孫歸父如齊

歸父仲遂之子胡氏曰宣公深德齊侯之能定其位故生則傾身以

事之而不辭屈辱沒則親往奔喪而使貴卿會其葬

葬齊惠公

晉人宋人衛人曹人伐鄭

左傳曰鄭及楚平諸侯之師伐鄭取成而還胡

氏曰鄭居大國之間從于彊令豈其罪乎不能以德撫而爭之以力庸何愈于楚襄陵許氏曰自晉

靈以來成景相繼力爭陳鄭而無以服楚高氏曰
是時陳有弑君之亂曾是不圖而從事于鄭張氏
曰舍亂臣賊子之大惡而輕動干戈
以討迫於彊令無所適從之小國

秋

天王使王季子來聘

公羊傳曰王季子者王之弟也左傳曰劉康公來報聘

杜氏曰康公即王季子其後食邑于劉澄曰王之
子以王子為氏季其字也天子四命之大夫稱氏
稱字如南季氏也以王子為氏者稱王子季則不
成辭故曰王季子報聘者報九年夏仲孫蔑之聘
也張氏曰宣公事周簡慢極矣僅遣一介而重臣
繼來胡氏曰宣公至是享國十年不朝于周而比
年朝齊不奔王喪而奔齊侯喪不遣貴卿會匡王
葬而使歸父會齊之葬縱未舉法勿聘焉猶可也

而使王季子來王靈益不振矣襄陵許氏曰
自是王靈益亡王聘益輕春秋不復錄矣

公孫歸父帥師伐邾取繹

繹公作類。杜氏曰繹邾邑魯國鄒縣北有繹

山張氏曰詩保有鳧繹邾文公遷于繹皆此今在
襲慶府鄒縣為邾魯二國之境高氏曰自文公時
邾魯有隙宣公篡立而邾子首朝之自是絕迹魯
廷者又十年故歸父帥師以討其罪然以貴卿為
將舉大衆而征伐不施於亂臣賊子而
陵弱侵小近在附庸之國是為盜也

大水

季孫行父如齊

始聘嗣君也

冬

公孫歸父如齊

左傳曰伐邾故也高氏曰以伐邾故恐齊人以為討遂謀伐莒焉甚

美魯之懼齊也二歲之間而公與大夫如齊者五胡氏曰齊侯嗣立宣公親往奔其父喪又使貴卿會葬矣若待逾年然後脩聘未晚也而季孫行父亟行歸父繼往宣公君臣不知為國以禮而謂以妄悅之可以免討也歸父貪于取繹畏齊而往蓋理曲則氣必餒能無畏乎

齊侯使國佐來聘

高氏曰嗣子逾年即位始稱君未逾年稱子故葵丘之會稱宋

子蓋齊桓方倡大義以尊中國諸侯之從者唯恐後故宋公雖在喪而來與會亦不深責以其不獲已而趨急務爾魯之於齊與國也聘雖後時亦何害耶惠公之卒葬之既速又未逾年而以君命遽遣使來聘焉議伐莒也當凶釁而行吉禮忘哀思而結歡好書曰齊侯著其惡也

饑

張氏曰王政以民食為重故積貯天下之大命也前此百有餘年水旱螟螣之災多矣不以饑

書今大水之後特書饑者著宣公煩於事外國用無節上下用竭故一遇水旱遂致乏食爾

楚子伐鄭

高氏曰是夏鄭因晉同三國見伐而復棄楚故楚子又伐鄭據左氏載晉士會

救鄭及諸侯伐鄭而春秋削之者責晉雖得鄭而不能有之也

經書月三書日三大衍歷正月丁亥大乙巳冬至二月丁巳小三月丙戌大四月丙辰大日食己巳十四日五月丙戌小癸巳八日六月乙卯大七月乙酉小八月甲寅大九月甲申小十月癸丑大十一月癸未小十二月壬子大長

歷是年閏五月癸巳五月九日

十有一年

癸亥定王九年。晉霸景二。蔡文十四。曹文二十。衛穆二。鄭襄七。陳成

公午元年○杞桓三十九○宋文十三○
齊頃公無野元年○秦桓七○楚莊十六

春

王正月

夏

楚子陳侯鄭伯盟于辰陵

辰穀作夷○左傳曰楚子伐鄭及櫟子良曰晉

楚不務德而兵爭與其來者可也晉楚無信我焉得有信乃從楚盟于辰陵陳鄭服也杜氏曰辰陵陳地潁川長平縣東南有辰亭張氏曰今陳州西華縣楚莊於是合二國為盟而欲討陳夏徵舒也春秋以晉齊二大國方見用兵于莒狄而不能討獨楚合諸侯以討之所以楚子書爵於陳侯鄭伯

之上與之也

公孫歸父會齊人伐莒

張氏曰莒恃晉而不事齊魯事齊故從齊而伐之兵

不討亂而附彊陵弱著齊魯之罪也

秋

晉侯會狄于攢函

攢才端切函音咸。左傳曰晉卻成子求成于衆狄衆狄疾赤

狄之役遂服于晉會于攢函衆狄服也杜氏曰攢函狄地澄曰楚方倡義于天下而晉孜孜于羣狄至往會焉晉卑甚矣高氏曰是時晉失諸侯陳鄭諸國皆棄晉而從楚于是狄在攢函而晉侯親往會之夫中國諸侯所恃者晉爾齊方伐莒晉方會狄而使楚人為霸者之事此反道也

冬

十月

楚人殺夏徵舒

左傳曰楚子為陳亂故伐陳謂陳人無動將討于少西氏遂入

陳執夏徵舒輶諸栗門高氏曰弑君之賊固人可得而殺之豈有所挾擇于其間哉然徵舒弑君今已逾年國人不能討天子方伯不能誅反致楚人執大義而殺之楚荆蠻尚知弑君之當殺則中國如之何不能殺之耶聖人書此傷中國之不自正也

丁亥楚子入陳納公孫寧儀行父于陳

寧公作甯左傳曰

陳侯在晉因縣陳申叔時曰夏徵舒弑其君其罪大矣討而戮之君之義也諸侯之從也曰討有罪

也今縣陳貪其富也以討召諸侯而以貪歸之無
乃不可乎王曰善哉乃復封陳鄉取一人焉以歸
謂之夏州高氏曰是時陳侯在晉故楚子不動干
戈自入于陳然則人君可輕出乎呂氏曰楚人殺
陳夏徵舒討賊之辭且衆同欲也故曰楚人入陳
非衆志也故曰楚子胡氏曰公孫寧儀行父從君
於昏宣淫於朝誅殺諫臣使其君見弑蓋致亂之
臣也肆諸市朝與衆同棄然後快於人心今乃詭
辭奔楚託於討賊復讎以自脫其罪而楚莊亦不
能察又使陳人用之可乎為楚莊者宜奈何褚徵
舒之宮封洩冶之墓尸孔寧儀行父于
朝謀于陳衆定其君而去其庶幾乎

經書月二書日一大衍歷正月壬午小庚戌冬至
閏月辛亥大二月辛巳小旦日大寒三月庚戌大
四月庚辰小五月己酉大六月己卯小七月戊申
大八月戊寅大九月戊申小十月丁丑大丁亥十

一日十一月丁未
小十二月丙子大

十有二年

○甲子定王十年○晉霸景三○蔡文十五
○曹文二十一○衛穆三○鄭襄八○陳

成二○杞桓四十○宋文十四○
齊頃二○秦桓八○楚莊十七

春

葬陳靈公

賊討國復二十
二月而後得葬

楚子圍鄭

左傳曰鄭既受盟于辰陵又微事于晉
楚圍鄭克之入自皇門至于達路鄭伯

內袒牽羊以逆退三十里而許之平潘廷入盟子
良出質登曰中國不能霸與國屈服于荆蠻鄭伯

禮之恭辭之善以媚悅於
楚極矣至今使人惡之

夏

六月

乙卯晉荀林父帥師及楚子戰于邲晉師敗績

邲

必切。左傳曰晉師救鄭荀林父將中軍先穀佐之士會將上軍郤克佐之趙朔將下軍欒書佐之及河間鄭既及楚平桓子欲還曰無及于鄭而勦民焉用之隨武子曰善會聞用師觀釁而動見可而進知難而退軍之善政也彘子曰不可晉所以霸師武臣力也今失諸侯不可謂力有敵而不從不可謂武由我失霸不如死以中軍佐濟楚子北師次于邲將飲馬于河而歸聞晉師既濟王欲還嬖人伍參欲戰言于王曰晉之從政者新未能行令其佐先穀剛愎不仁未肯用命其三帥者專行

不獲聽而無上衆誰適從此行也晉師必敗且君而逃臣若社稷何王病之次于管以待之楚少宰如晉師曰寡君此行也將鄭是訓定豈敢求罪于晉二三子無淹久隨季對曰昔平王命我先君文侯曰與鄭夾輔周室母廢王命今鄭不率寡君使羣臣問諸鄭豈敢辱侯人彘子以為諂使趙括從而更之曰行人失辭寡君使羣臣遷大國之迹於鄭曰無避敵羣臣無所逃命楚子又使求成于晉晉人許之盟有日矣楚許伯御樂伯攝叔為右以致晉師晉魏錡求公族未得而怒欲敗晉師請致師弗許請使許之遂往請戰而還趙旃求卿未得且怒于失楚之致師者請挑戰弗許請召盟許之與魏錡皆命而往晉人懼二子之怒楚師也使以軼車逆之潘黨望其塵使騁而告曰晉師至矣楚人亦懼王之入晉軍也遂出陣孫叔曰進之寧我薄人無人薄我遂疾進師車馳卒奔乘晉軍桓子

不知所為鼓於軍中曰先濟者有賞中軍下軍爭舟舟中之指可掬也晉師右移上軍未動工尹齊將右拒卒以逐下軍潘黨率游闕四十乘從唐侯為左拒以從上軍隨季曰楚師方壯若萃于我吾師必盡不如收而去之分謗生民不亦可乎殿其卒而退不敗楚熊負羈囚知葦知莊子以其族反之厨武子御下軍之士多從之射連尹襄老獲之載其尸射公子穀臣囚之以二者還及昏楚師軍於郢晉之餘師不能軍宵濟亦終夜有聲楚重至于郢遂次于衡雍祀于河作先君宮告成事而還杜氏曰郢鄭地張氏曰地譜鄭州城下管城縣有郢城在縣南晉不能討陳亂已失三綱軍政之本乃欲恃力以爭鄭不知楚莊既討陳亂則師出有名而所以施于鄭者又進退得宜勇怯中節林父上不能輔君討亂以行主盟之大義而此行本為救鄭而鄭已服楚士穀之徒恃彊專制故林父雖

知楚之不可敵而不能止諸帥之從楚師此春秋特以林父主此戰著其敗師之罪也

秋

七月

冬

十有二月

戊寅楚子滅蕭

左傳曰楚子伐蕭宋華椒以蔡人救蕭蕭人囚熊相宜僚及公子丙

王曰勿殺吾退蕭人殺之王怒遂圍蕭蕭潰杜氏曰蕭宋附庸國也高氏曰楚既得陳鄭又敗晉師遂深入中國憑陵諸夏滅人之國

晉人宋人衛人曹人同盟于清丘

杜氏曰清丘地張氏曰清丘地譜

今濮州臨濮縣東南有清丘高氏曰晉為楚所敗故諸侯懼而為此盟既又不旋踵而皆背之蓋按春秋之例會盟戰伐有君在則雖國卿亦降稱人其特出姓名者著其罪也此盟雖無君在然盟者霸主及國君之事也今皆以大

夫行之故雖無君臣亦降稱人

宋師伐陳

左傳曰宋為盟故伐陳杜氏曰陳貳于楚故高氏曰陳有弑逆之事宋不能討

而楚能討之宋以楚子滅蕭且為清丘之盟故請于晉以伐陳以討其道楚師之罪

衛人救陳

高氏曰書衛救陳者所以罪宋也然衛方盟于清丘而反救陳救雖義事而有

背盟之惡

經書月三書日二大衍歷正月丙午小丙辰冬至
二月乙亥大三月乙巳小四月甲戌大五月甲辰
小六月癸酉大七月癸卯小經六月乙卯在此月
八月壬申大九月壬寅小十月辛未大十一月辛
丑小十二月庚午大戊寅九日長歷是年閏五月
乙卯六月十四日十一月己亥朔戊寅在十一月
十有三年乙丑定王十一年○晉霸景四○蔡文十
六○曹文二十二○衛穆四○鄭襄九○
陳成三○杞桓四十一○宋文十五
○齊頃三○秦桓九○楚莊十八

春

齊師伐莒

莒公作衛○左傳曰莒恃晉而不事齊
故也澄曰齊以彊陵弱而伐莒且十一

年之伐稱齊人此稱齊師者
甚其動大衆而伐小國也

夏

楚子伐宋

左傳曰以其救蕭也胡氏曰楚滅蕭將以脅宋諸侯懼而同盟為宋人計者恤

民固本輕徭薄賦使民效死親其上則可以待敵矣計不出此而急於伐陳攻楚與國非策也故楚

有辭于伐

秋

螽

為災故書

冬

晉殺其大夫先穀

左傳曰赤狄伐晉及清先穀召之也晉人討邲之敗與清之師

歸罪于先穀而殺之盡滅其族高氏曰邲之役三帥皆欲還先穀固請戰遂及于敗至是以為討然釋趙旃魏錡不討而獨誅先穀為政不平殺者不受治矣又族滅之惡之甚也張氏曰越椒將攻王而楚莊尚思子文之治楚而復克黃之所先穀先軫之孫而滅其族蓋晉之德刑皆不足以敵楚矣經書月無書日無大衍歷正月庚子大辛酉冬至二月庚子小三月己亥大四月己巳小五月戊戌大六月戊辰小七月丁酉大八月丁卯小九月丙申大閏月丙寅小十月乙未大十一月乙丑小十二月甲午大

十有四年

丙寅定王十二年。晉霸景五。蔡文十七。曹文二十三卒。衛穆五。鄭襄十

六。陳成四。杞桓四十二。宋文十六。齊頃四。秦桓十。楚莊十九。

春

衛殺其大夫孔達

左傳曰清丘之盟晉以衛之救陳也討焉使人弗去曰罪無所

歸將加而師孔達曰苟利社稷請以我說罪我之由我則為政而亢大國之討將以誰任我則死之繼而死衛人以說于晉而免遂告于諸侯曰寡君有不令之臣達構我敝邑于大國既伏其罪矣敢告衛人以為成勞復室其子使復其位高氏曰晉既討邲之敗而殺先穀矣以衛背清丘之盟而救陳也討焉孔達自知不可免乃縊而死衛人因以說于晉故稱國以殺

夏

五月

壬申曹伯壽卒

太公也在位三十三年子盧嗣是為宣公

晉侯伐鄭

左傳曰為郕故也告於諸侯蒐焉而還中行桓子之謀也曰示之以整使謀而

來鄭人懼使子張代子良于楚鄭伯如楚謀晉高氏曰晉救鄭而敗于郕鄭遂即楚夫鄭背德忘恩討之正也然自文公沒襄公僅能脩先君之業靈公幼而趙盾為政其殆庶幾矣成景之世文公之澤寢微干戈日尋積而至于蜀之盟而諸侯盡屬楚矣豈特失鄭而已乎

秋

九月

楚子圍宋

左傳曰楚子使申舟聘于齊及宋宋人止之華元曰過我而不假道鄙我也鄙

我亡也殺其使必伐我伐我亦亡也亡一也乃殺之楚子圍宋澄曰宋前以救蕭而見伐今又以殺楚使而受圍楚之荐食上國宋之挑釁彊隣俱可罪也

葬曹文公

冬

公孫歸父會齊侯于穀

高氏曰齊侯在穀而歸父往聘焉故不書于齊蓋謀

於齊侯而平楚宋也齊人始疑張氏曰魯素事齊而宣公之立公子遂主之故其父子常親于齊而齊亦不復計等列之不班從而與之會也王氏曰遂以不正而立宣公公以不正而任其子歸父此年會齊侯明年會楚子見公與之深也諸侯失政自宣公始大夫專政自歸父始石氏曰文公以來

大夫擅專盟會
至是以為常矣

經書月二書日一大衍歷正月甲子小丙寅冬至
二月癸巳大三月癸亥小四月壬辰大五月壬戌
大壬申十一日六月壬辰小七月辛酉大八月辛
卯小九月庚申小十月巳丑大十一月巳未大十
二月己丑小長歷
壬申五月十二日

十有五年

丁卯定王十三年。晉霸景六。蔡文十
八。曹宣公盧元年。衛穆六。鄭襄十

一。陳成五。杞桓四十三。宋文十
七。齊頃五。秦桓十一。楚莊二十

春

公孫歸父會楚子于宋

左傳曰孟獻子言于公曰
臣聞小國之免于大國也

聘而獻物於是有所庭實旅百朝而獻功於是有所
貌采章嘉淑而有加貨謀其不免也誅而薦賄則
無及也今楚在宋君其圖之公說襄陵許氏曰楚
圍宋之威振及魯矣胡氏曰楚不假道于宋以啟
釁端而圍之陵蔑中華甚矣諸侯縱不能畏簡書
邶同惡存先代之後嚴兵固圉以為聲援猶之可
也乃以周公之裔千乘之國謀其不免至於薦
賄不亦鄙乎比事以觀則知中國盛衰之由矣

夏

五月

宋人及楚人平

左傳曰宋人使樂嬰齊告急于晉
晉侯欲救之伯宗曰不可古人有

言曰雖鞭之長不及馬腹天方授楚未可與爭雖
晉之彊能違天乎乃止楚師將去宋申犀稽首于

王之馬前曰毋畏知死而不敢廢王命王棄言焉
王不能答申叔時僕曰蔡室反耕者宋必聽命從
之宋人懼使華元夜入楚師登子反之床起之曰
寡君使元以病告曰敝邑易子而食析骸以爨雖
然城下之盟有以國斃不能從也去我三十里惟
命是聽子反懼與之盟而告王退三十里宋及楚
平華元為質杜氏諤曰禦狄之道莫大乎完守備
也今楚子自秋九月圍宋至此歷三時宋固守以
待晉之救非不完于所備也晉不能援救之宋儻
不求平于楚則若社稷何若邦衆何由是不得已
及楚平澄曰平者兩國之大夫也然此權非可自
大夫出故二國之卿皆降稱人與清丘之盟同例
公至自會

六月

癸卯晉師滅赤狄潞氏以潞子嬰兒歸

左傳曰潞子嬰兒之

夫人晉景公之姊也鄆舒為政而殺之又傷潞子之目晉荀林父敗狄于曲梁滅潞張氏曰潞氏今

潞州潞城縣杜氏曰潞氏赤狄之別族國故稱氏子爵也王氏箋義曰東遷之後狄以寢盛諸侯不

能制乃與之會盟交聘雖云進之以漸蓋亦患之甚也赤狄近于晉並為晉患比數侵齊奪黎氏

地疆土益廣晉侯因鄆舒之罪命桓子伐而滅之陳氏折衷曰稱潞子蓋滅國以其君歸皆稱爵如

齊人滅弦弦子奔黃楚人滅頓以頓子牂歸楚人滅胡以胡子豹歸第言奔者不名之以歸者名之

高氏曰是時楚肆其疆國宋踰年晉不能救而反滅狄利其土地亦急於憂中國矣

秦人伐晉

左傳曰秦桓公伐晉次于輔氏魏顆敗秦師高氏曰自二年秦師伐晉晉不報

秦今十四年矣此復來伐者乘
晉兵遠事狄土而闕其虛也

王札子殺毛伯召伯

左傳曰王孫蘇與召氏毛氏
爭政使王子捷殺召戴伯及

毛伯衛卒立召襄孫氏曰王札子文誤倒爾杜氏
諤曰桓襄之前列國諸侯交相戰伐列國不稟王
命也至此而臣有相殺者
內之卿士不奉王命也

秋

螽

張氏曰按自六年至今三遇螽災而水旱未
與焉此宣公不脩德節用愛人之所感也

仲孫蔑會齊高固于無婁

無公作牟○杜氏曰無
婁杞邑張氏曰大夫相

會蓋始于此高氏曰齊侯在穀則公孫歸父會之
齊卿在無婁則仲孫蔑會之蓋公主齊久矣幸晉

楚之爭而不我及也忽焉而平楚宋俾歸父請於齊侯齊侯則疑我之從楚也蔑于是會焉以脩舊好

初稅畝

公羊傳曰初始也稅畝者履畝而稅也穀梁傳曰古者三百步為里名曰井田井九

百畝藉而不稅杜氏曰公田之法十取其一今又履其餘畝復十收其一遂以為常故曰初

冬

蛰生

蛰悅全切又去聲○高郵孫氏曰蛰者螽之子也春秋之秋夏時之夏春秋之冬夏時之

秋也螽為災于夏而蛰生于秋一歲而再為災故志之

饑

胡氏曰春秋饑歲多矣書于經者三而宣公有其二張氏曰宣兩書饑一在大水之後一在螽

蠲之後甚言國無蓄積而民無以生也

經書月二書日一大衍歷正月戊午大辛未冬至
二月戊子小三月丁巳大四月丁亥小五月丙辰
大六月丙戌小癸卯十八日七月乙卯大八月乙
酉大九月乙酉小十月甲申大十一月甲寅小十
二月癸未大長歷是年閏
十一月癸卯六月十九日

十有六年

戊辰定王十四年。晉霸景七。蔡文十
九。曹宣二。衛穆七。鄭襄十二。陳

成六。杞桓四十四。宋文十八。
齊頃六。秦桓十二。楚莊二十一。

春

王正月

晉人滅赤狄甲氏及留吁

左傳曰晉士會帥師滅赤狄甲氏及留吁鐸辰

杜氏曰甲氏留吁赤狄之族晉既滅潞氏今又并盡其餘黨高氏曰書及所以別言二氏也胡氏曰甲氏潞之餘裔留吁其殘邑也要荒之外王者所並生不使侵軼則止矣必欲盡殄滅之無遺類豈仁人之心王者之事乎

夏

成周宣榭火

榭公作謝火公穀作災○公羊傳曰成周者東周也左傳曰人火之也杜

氏曰成周洛陽宣榭講武屋爾雅曰無室曰榭謂屋歇前澄曰公羊以宣榭為宣宮之榭穀梁以為樂器所藏何休以為宣王之廟至此不毀者有中興之功啖氏曰按宣王之廟久已毀矣縱失禮不

毀止當在王城不當在成周也李氏堯俞曰廟不應有榑榑不應藏樂榑者講武之所宣者其宣王之所為乎至是歷十二世王業日壞求其如宣之盛既不可得而見而王之迹又煨燼蓋痛之也高氏曰國語曰先王之為臺榑也臺不過望氛氣榑不過講軍實宣王中興南征荆舒北伐獯豸內修政以復文武之竟土今周復衰平惠以降皆庸暗齷齪無能興者孟子曰夫明堂者王者之堂也王欲行王政則勿毀之矣況我宣王中興講武之座屋子孫衰微不能振舊而反為火所焚乎

秋

鄭伯姬來歸

左傳曰出也高氏曰不能事舅姑為夫所出見棄而歸也呂氏曰婦人既

嫁而出人道之大者故書之

冬

大有年

穀梁傳曰五穀大熟為大有年。蓋謂宣公

忽大有年
記異也

經書月一書日無大衍歷正月癸丑小丁丑冬至
二月壬午大三月壬子小四月辛巳大五月辛亥
小六月庚辰大戊申小滿閏月庚戌小七月己卯
大旦日夏至八月己酉小九月戊寅大十月戊申
小十一月丁丑大
十二月丁未大

十有七年

己巳定王十五年。晉霸景八。蔡文二
十卒。曹宣三。衛穆八。鄭襄十三。○

陳成七。○杞桓四十五。○宋文十九。○
齊頃七。○秦桓十三。○楚莊二十二。

春

王正月

庚子許男錫我卒

許昭公也在位三十年其子甯立是為靈公

丁未蔡侯申卒

蔡文公也在位二十年其子固立是為景公

夏

葬許昭公

葬蔡文公

胡氏曰日卒書名赴得禮也葬不月其畧在內宣公不知禮義邦交之實送終

獨厚於齊而利害不切于身者皆薄其禮大則君親次則盟主又其次若秦若衛若滕雖赴告而不

會葬考春秋之備書而宣
公失事上交隣之禮見矣

六月

癸卯日有食之

己未公會晉侯衛侯曹伯邾子同盟于斷道

斷音短○

左傳曰晉侯使郤克徵會于齊齊頃公帷婦人使
觀之郤子登婦人笑于房獻子怒出而擔曰所不
此報無能涉河齊侯使高固晏弱蔡朝南郭偃會
及斂孟高固逃歸盟于卷楚辭齊人晉人執晏弱
于野王執蔡朝於原執南郭偃于溫晉師還杜氏
曰斷道晉地張氏曰此蓋郤克怒齊假同盟之禮
約諸侯共
伐齊也

秋

公至自會

冬

十有一月

壬午公弟叔肸卒

肸許乙切。曰公弟者以屬書。未命為大夫故不以公子為氏。

肸之生雖未為卿而於其死也宣公寵愛之故賜之族使其子孫世世為卿如季友仲遂

經書月三書日五大衍歷正月丁丑小壬午冬至

庚子二十四日二月丙午大二月丁未經有日無月三月丙子小四月乙巳大五月乙亥小六月甲辰大己未十六日經書六月癸卯日食程氏公說

曰大衍歷食當在五月乙亥朔食黃道胃十三度
少七月甲戌小八月癸卯大九月癸酉小十月壬
寅大十一月壬申小壬午十一日十二月辛丑大
長歷庚子正月二十六日丁未二月四日己未六
月十七日壬午
十一月十三日

十有八年

庚午定王十六年。晉霸景九。蔡景公
國元年。曹宣四。衛穆九。鄭襄十四。

○陳成八。杞桓四十六。宋文二十。
齊頃八。秦桓十四。楚莊二十三卒。

春

晉侯衛世子臧伐齊

左傳曰晉侯衛世子臧伐齊
至于陽穀齊侯會晉侯盟于

緇以公子疆為質于晉晉師還蔡朝南郭偃逃歸
高氏曰晉衛先伐齊故齊人求成以緩諸侯之師

公伐杞

高氏曰杞自文十六年來朝而不復至故伐之已不脩德而欲人之朝已亦不思之

甚矣

夏

四月

秋

七月

邾人戕鄆子于鄆

左傳曰凡自虐其君曰弑自外曰戕杜氏曰弑戕皆殺也弑者

積微而起所以相測量非一朝一夕戕者卒暴之名陸氏希聲曰弑非其君曰戕范氏曰于鄆惡其

臣子不能距難孫氏曰僖十九年邾人執鄆子用
之天子不能誅故此肆然復戕鄆子于鄆也胡氏
曰邾人蓋嘗執鄆子用之則不共戴天之世讎也
既不能復又使邾人得造其國都而戕殺其君曰
于鄆者所以深責鄆之臣子也

甲戌楚子旅卒

旅穀作呂○楚莊王也在位二十三年子共王審嗣高氏曰前此不

書楚子之卒者以外之也此書之者以楚入為中
國之害甚於前日中國不能自正乃與楚人相為
朝聘相與盟誓相通問好故自此詳卒也

公孫歸父如晉

左傳曰公孫歸父以襄仲之立公也有寵欲去三桓以張公室與公

謀而聘於晉欲以晉人去之高氏曰公自篡立以
來所以事齊諂矣晚覲齊之不競於晉則翻然事

晉而棄齊如遺迹焉甚哉利之使人輕合易絕也
傳載公之欲謀伐齊至成二年而有鞏之役蓋歸
父此行實為始謀亦以三桓專命欲假晉以去之
故也胡氏曰宣公刻意事齊易世猶未怠也及頃
公不能謹禮怒晉魯上卿而卻克當國決策討之
晉方強盛齊少懦矣於是背齊而事晉其于邦交
以利為向背者也況欲以晉人去三桓夫輕於背
大國易於謀大家而不知其本末未有能成而無
悔者也

冬

十月

壬戌公薨于路寢

正其終也

歸父還自晉至莒遂奔齊

莒公作榿○左傳曰公季文子言於朝曰使

我殺適立庶以失大援者仲也夫臧宣叔怒曰當其時不能治後之人何罪予欲去之許請去之遂逐東門氏子家還及莒壇惟復命於介既復命袒括髮即位哭三踊而出遂奔齊高氏曰夫先君未殯而逐其臣是死其君而忘其父也歸父既畢使事盡哀而奔是知死亡之不免而能不失度於顛沛造次之時異乎它大夫之奔矣雖然人臣之正受命而出雖君薨猶當致命于殯前若其有罪待命於新君可也今歸父還未及魯境遽即奔齊則有惡於新君矣故書逐書奔以著其逃刑之罪則經書月二書日二大衍歷正月辛未小丁亥冬至二月庚子大三月庚午小四月己亥大五月己巳大六月己亥小七月戊辰大甲戌七日八月戊戌小九月丁卯大十月丁酉小壬戌二十六日十一

月丙寅大十二月丙申小長歷甲
戌七月八日壬戌十月二十八日



春秋纂言卷七